



74  
6262  
2



6262  
2



東漢會要卷五

宋 徐天麟 撰

禮三 吉禮

社稷 五祀

建武二年立大社稷于雒陽在宗廟之右方壇無屋有牆門而已二月八月及臘一歲三祠皆太牢具使有司祠孝經援神契曰社者土地之主也稷者五穀之長也禮記及國語皆謂其工氏之子曰句龍為后土官能平九土故祀以為社烈山氏之子曰柱能植百穀疏自夏

東漢會要

卷五

一



去五味均平歲



以上祀以為稷。至殷以柱久遠而堯時棄為后稷亦植百穀。故廢柱祀棄為稷。大司農鄭元說古者官有大功則配食其神。故句龍配食于社。棄配食于稷。郡縣置社稷。太守令長侍祠。牲用羊豕。唯州所治有社無稷。以其使官古者師行平有載社主不載稷也。國家亦有五祀之祭。有司掌之。其禮簡于社稷云。志注云五祀門戶井竈中霤也。

靈星

漢興八年有言周興而邑立后稷之祀。于是高帝令天下立靈星祠。言祠后稷而謂之靈星者。以后稷又配食

星也。舊說星謂天田星也。一曰龍左角為天田官主穀。祀用壬辰位祠之。壬為水辰為龍。就其類也。牲用太牢。縣邑令長侍祠。舞者用童男十六人。舞者象教田。初為芟除。次耕種。芸耨。驅爵及穫刈。春簸之。形象其功也。志今注曰元和三年初為郡國立稷及祠社靈星禮器。

六宗

安帝元初六年以尙書歐陽家說謂六宗者在天地四方之中。為上下四方之宗。以元始故事謂六宗易六子之氣。日月雷公風伯山澤者為非。是三月庚辰初更立

六宗祀于雒陽西北戌亥之地禮比太社也志

范曄論曰言天地者莫大于易易無六宗在中之象若

信為天地四方所宗是至大也而比太社又為失所難

以為誠矣按光武紀注云平帝元始中謂六宗為易六

子之氣水火雷風山澤也光武中興遵而不

祠孔子

建武五年十月光武幸魯使大司空祠孔子紀

明帝永平二年養三老五更于辟雍郡縣行鄉飲酒禮

于學校皆祀聖師周公孔子牲以犬志

十五年三月幸孔子宅祠仲尼及七十二弟子親御講

堂命皇太子諸王說經紀

章帝元和二年春帝東巡狩還過魯幸闕里以太牢祠

孔子及七十二人作六代之樂大會孔氏男子二十以

上者六十三人命儒者講論語帝謂孔僖曰今日之會

于卿宗有光榮乎對曰臣聞明王聖主莫不尊師貴道

今陛下親屈萬乘辱臨敝里此乃崇禮先師增輝聖德

至于光榮非所敢承帝笑曰非聖者子孫焉有斯言乎

遂拜僖郎中賜褒成侯損及孔氏男女錢帛孔僖傳

安帝延光三年幸泰山祀孔子及七十二弟子于闕里自魯相令丞尉及孔氏親屬婦女諸生悉會賜褒成侯以下帛各有差紀

肅宗賜東平王蒼書曰今魯國孔子廟尚有仲尼車輿

冠履明德盛者光靈遠也東平王傳西征記曰魯人藏孔子所乘車于廟中是顏路

所請者也獻帝時遇火燒之

鍾離意為魯相出私錢付戶曹孔訢修夫子車身入廟拭几席劍履男子張伯除堂下草土中得玉璧七枚伯懷其一以六枚白意意令主簿安置几前孔子教授堂

下牀首有懸甕孔訢曰夫子甕也背有丹書人不敢發意曰夫子聖人所以遺甕欲以垂示後賢因發之中得素書文曰後世修吾書董仲舒護吾車拭吾履發吾筥會稽鍾離意璧有七張伯藏其一意即召伯問果服焉

鍾離意傳

臣天麟按文王世子曰凡學春官釋奠于先聖先師秋冬亦如之又曰凡始立學者必釋奠于先聖先師既釁器用幣然後釋菜則知古人建立學校未嘗不以祀禮為先也高皇帝雖在倥傯猶能修其祠于過

魯之日。武帝興太學。而獨未聞釋奠之禮焉。明帝行鄉飲于學校。祀聖師周公孔子。初似未知所以。獨崇宣聖之意。至永平十五年。幸孔子宅祠仲尼。章帝安帝皆幸闕里祠孔子。作六代之樂。則所以崇文重道者至矣。使當時儒士之臣能以古人釋奠之禮而推廣之。則又何以加焉。

### 高禘

仲春之月立高禘祠于城南。祀以特牲。禮儀志盧植云。元鳥至時陰陽中萬物生于是以三牲請于高禘。居明顯之處。故謂之高。因求子故謂之禘。以古者有媒氏之官。因以為神。

### 飲酎

八月飲酎。禮儀志

章帝建初七年八月飲酎高廟。紀

丁孚漢儀曰。酎金律文帝所加。以正月旦作酒。八月成。名酎酒。因令諸侯助祭。貢金。禮儀志注

### 雜祭祀

仲秋之月祀老人星于國郡南郊老人廟。季秋之月祠星于城南壇心星廟。上同

明帝永平二年十一月遣使者以中牢祠蕭何霍光帝

謁陵園過式其墓紀下

六年十月行幸魯祠東海恭王陵

十二月還幸陽城遣使者祠中岳

十年幸南陽祠章陵日北至又祠舊宅

十五年幸魯祠東海恭王陵至定陶祠定陶恭王陵

章帝即位元和二年詔曰山川百神應祀者未盡其議

增修羣祀宜享祀者二月上東巡狩將至泰山道使使

者奉一太牢祀帝堯于濟陰成陽靈臺上至泰山修光  
武山南壇兆辛未柴祭天地羣神如故事壬申宗祀五

帝于孝武所作汶上明堂光武帝配如雒陽明堂祀癸

酉更告祀高祖太宗世宗中宗世祖顯宗於明堂各一

太牢卒事遂覲東后享賜王侯羣臣因行郡國幸魯祠

東海恭王及孔子七十二弟子四月還京都庚申告祠

高廟世祖各一特牛又為靈臺十二門作詩各以其月

奏之和帝無所增改志

殤帝延平元年四月詔罷祀官不在祀典者本紀注云

安帝延光三年上東巡狩至泰山柴祭及祠汶上明堂

鄧太后性不好淫祀

如元和三年故事順帝即位修奉常祀志

桓帝即位十八年好神仙事延熹八年初使中常侍之

陳國苦縣祠老子九年親祠老子於濯龍文蔚為壇飾

涓金釳器設華蓋之座用郊天樂也

延熹八年四月丁巳壞郡國諸房祀本紀袁紀云壞諸淫祀

縣邑常以乙未日祠先農于乙地以丙戌日祠風伯于

戌地己丑日祠雨師于丑地用豕羊志

范曄論曰臧文仲祀爰居而孔子以為不知漢書郊祀

志著自秦以來訖于王莽典祀或有未修而爰居之類

眾焉世祖中興蠲除非常修復舊祀方之前事邈殊矣

齋

凡齋天地七日宗廟山川五日小祠三日齋日內有汗

染解齋副倅行禮先齋一日有汗穢災變齋祀如儀大

喪唯天郊越紼而齋地以下皆百日後乃齋如故事禮儀志

志

夕牲

正月天郊夕牲晝漏未盡十八刻初納夜漏未盡八刻

初納進熟獻太祝送旋皆就燎位宰祝舉火燔柴火然



天子再拜興有司告事畢也明堂五郊宗廟太社稷六宗夕牲皆以晝漏十四刻初納夜漏未盡七刻初納進熟獻送神還有司告事畢六宗燔燎火然有司官告事畢禮儀志

迎氣

迎時氣五郊之兆自永平中以禮識及月令有五郊迎氣服色因采元始中故事兆五郊于雒陽四方中兆在東壇皆三尺階無等立春之日迎春于東郊祭青帝句芒車旂服飾皆青歌青陽八佾舞雲翹之舞及因賜文

官太傅司徒以下縑各有差立夏之日迎夏于南郊祭赤帝祝融車旂服飾皆赤歌朱明八佾舞雲翹之舞先立秋十八日迎黃靈于中兆祭黃帝后土車旂服飾皆黃歌帝臨八佾舞雲翹育命之舞立秋之日迎秋于西郊祭白帝蓐收車旂服飾皆白歌西皓八佾舞育命之舞立冬之日迎冬于北郊祭黑帝元冥車旂服飾皆黑歌元冥八佾舞育命之舞按本紀永平二年始迎氣于五郊祭祀志

立春

立春之日夜漏未盡五刻京師百官皆衣青衣郡國縣

道官下至斗食令史皆服青幘立青幡施土牛耕人于門外以示兆民至立夏惟武官不立春之日下寬大書曰制詔三公方春東作敬始慎微動作從之罪非殊死且勿案驗皆須麥秋退貪殘進柔良下當用者如故事

禮儀志

縣邑常以立春之日皆青幡幘迎春于東郭外令一童男冒青巾衣青衣先在東郭外野中迎春至者自野中出則迎者拜之而還三時不迎祭祀志

立夏

立夏之日夜漏未盡五刻京都百官皆衣赤至季夏衣黃郊其禮祠特祭竈

夏至

日夏至禁舉大火止炭鼓鑄消石冶皆絕止至立秋如故事是日浚井改水日冬至鑽燧改火云

黃郊

先立秋十八日郊黃帝是日夜漏未盡五刻京都百官皆衣黃至立秋迎氣于黃郊奏黃鍾之宮歌帝臨冕而執干戚舞雲翹育命所以養時訓也

東漢會要 卷五  
九  
立秋

立秋之日夜漏未盡五刻京都百官皆衣白施阜領緣中衣迎氣于白郊禮畢皆衣絳至立冬。

立冬

立冬之日夜漏未盡五刻京都百官皆衣阜迎氣于黑郊禮畢皆衣絳至冬至絕事。

冬至

冬至前後君子安身靜體百官絕事不聽政擇吉辰而後省事絕事之日夜漏未盡五刻京都百官皆衣絳至

立春諸王時變服執事者先後其時皆一日日冬至夏至陰陽晷景長短之極微氣之所生也故使八能之士八人或吹黃鍾之律間竽或撞黃鍾之鍾或度晷景權水輕重水一升冬重十三兩或擊黃鍾之磬或鼓黃鍾之瑟軫間九尺二十五絃宮處于中左右爲商徵角羽或擊黃鍾之鼓先之三日太史謁之至日夏時四孟冬則四仲其氣至焉先氣至五刻太史令與八能之士卽坐于端門左塾大予具樂器夏赤冬黑列前殿之前西上鍾爲端守宮設席于器南北面東上正德席鼓南西

東漢會要 卷五  
面令晷儀東北三刻中黃門持兵引太史令八能之士入自端門就位二刻侍中尚書御史謁者皆陞一刻乘輿親御臨軒安體靜居以聽之太史令前當軒潛北面跪舉手曰八能之士以備請行事制曰可太史令稽首曰諾起立少退顧令正德曰可行事正德曰諾皆旋復位正德立命八能士曰以次行事間音以竽八能士曰諾五音各三十爲闕正德曰合五音律先唱五音並作二十五闕皆音以竽訖正德曰八能士各言事八能士各書板言事文曰臣某言今月若干日甲乙日冬至黃鍾

之音調君道得孝道褒商臣角民徵事羽物各一板否則召太史令各板書封以皂囊送西陛跪授尚書施當軒北面稽首拜上封事尚書授侍中常侍迎受報聞以小黃門幡麾節度太史令前白禮畢制曰可太史令前稽首曰諾太史命八能士詣太官受賜陞者以次罷日夏至禮亦如之

合朔

每月朔旦太史上其月歷有司侍郎尚書見讀其令奉行其政朔前後各二日皆牽羊酒至社下以祭日日有

變割羊以祠用救日。日變執事者冠長冠衣阜單衣絳領袖緣中衣絳袴練以行禮如故事。

五供

正月上丁祠南郊禮畢次北郊明堂高廟世祖廟謂之

五供

並禮儀志

親耕

正月始耕。晝漏上水初納。執事告祠先農已享。耕時有司請行事就耕位。天子三公九卿諸侯百官以次耕。力田種各穰訖。有司告事畢。是月令曰。郡國守相皆勸民

始耕如儀志

漢舊儀曰。春始耕于藉田。官祠先農。先農即神農炎帝也。祠以一太牢。百官皆從。大賜三輔二百里。孝弟力田三老帛種百穀萬斛。為立藉田倉。置令丞。穀皆以給祭天地宗廟羣神之祀。以為粢盛。皇帝躬秉耒而耕。賀循曰。所種之穀黍稷種。注。農祥晨正。土膏脉起。乘鸞輅而駕蒼龍。介馭間以剡耜。躬三推于天田。修帝藉于千畝。供禘郊之粢盛。以致思于勤已。兆人勸于疆場。咸懋力以耘耔。東京賦

明帝永平四年二月詔曰朕親耕藉田以祈農事  
十三年二月帝耕于藉田禮畢賜觀者食

十五年二月帝耕于下邳

章帝元和三年帝耕于懷

並紀

順帝卽位以後不行藉田之禮黃瓊以國之大典不宜  
久廢上疏奏曰自古聖帝哲王莫不敬恭明祀增致福  
祥故必躬郊廟之禮親藉田之勤以先羣萌率勸農功  
昔周宣王不藉千畝號文公以爲大饑卒有姜戎之難  
終損中興之名竊見陛下遵稽古之鴻業體虔肅以應

天順時奉元懷柔百神朝夕觸塵埃于道路晝暮聆庶  
政以卹人雖詩詠成湯之不忘違書美文王之不暇食  
誠不能加今廟祀適闕而祈穀絜齋之事近在明日臣  
唯恐左右之心不欲屢動聖躬以爲親耕之禮可得而  
廢臣聞先王制典籍田有日司徒咸戒司空除壇先時  
五日有協風之應王卽齋宮享醴載耒誠重之也自癸  
巳以來仍西北風甘澤不集寒涼尙結迎春東郊旣不  
躬親先農之禮所宜自勉以迎和氣以致時風易曰君  
子自強不息斯其道也書奏帝從之

黃瓊傳

獻帝興平元年帝耕于藉田紀

親蠶

三月皇后帥公卿諸侯夫人蠶祠先蠶以少牢漢舊儀曰春桑生而皇后親桑于苑中于蠶室養蠶于薄以上祠以中牢羊豕祭蠶神曰苑窳婦人寓氏公主凡二神羣臣妾從桑還獻于繭觀皆賜從桑者絲皇后自行凡蠶絲絮織室以作祭服祭服者冕服也天地宗廟羣神五時之服其皇帝得以作縷縫衣得以作中絮而已置蠶官令丞諸天下官皆詣蠶室亦婦人從事故舊有東

西織室作治志并注

丁孚漢儀曰皇后出乘鸞輅青羽蓋駕駟馬龍旂九旒大將軍妻參乘太僕妻御前鸞旂車皮軒闔戟雒陽令奉引亦千乘萬騎車府令設鹵簿駕公卿五營校尉司隸校尉河南尹妻皆乘其官車帶夫本官綬從其官屬導從皇后置虎賁羽林騎戎頭黃門鼓吹五帝車女騎夾轂執法御史在前後亦有金鉦黃鉞五將導桑于蠶宮手三盆于繭館畢還宮月令曰禁婦人無觀按谷永對稱四月壬子皇后蠶桑之日也則漢桑亦用四月志注

祓禊

三月上巳官民皆絜于東流水上洗濯祓除去宿垢疢為大絜絜者言陽氣布暢萬物訖出始絜之矣謂之禊也

請雨

自立春至立夏盡立秋郡國上雨澤若少府郡縣各掃除社稷其早也公卿官長以次行雩禮求雨閉諸陽衣阜興土龍立土人舞僮二佾七日一變如故事反拘朱索社伐朱鼓禱賽以少牢如禮

桃印

仲夏之月萬物方盛日夏至陰氣萌作恐物不懋其禮以朱索連葦菜彌牟朴蠱鍾以桃印長六寸方三寸五色書文如法以施門戶代以所尚為飾夏后氏金行作葦茭言氣交也殷人水德以螺首謹其閉塞使如螺也周人木德以桃為更言氣相更也漢兼用之故以五月五日朱索五色印為門戶飾以難止惡氣並志

驅劉

立秋之日自郊禮畢始揚威武斬牲于郊東門以薦陵



廟其儀乘輿御戎路白馬朱鬣躬執弩射牲牲以鹿麋  
 太宰令謁者各一人載獲車馳駟送陵廟還宮遣使者  
 齋束帛以賜武官武官肄兵習戰陣之儀斬牲之禮名  
 曰貍劉兵官皆肄孫吳法六十四陣名曰乘之禮儀志  
 又祭祀志云立秋之日使謁者以一特牲祭先虞於壇  
 有事天子入圜躬牲以祭宗廟名曰貍劉

臘祖

季冬之月星迴歲終陰陽以交勞農大享臘禮儀志  
 陳寵王莽時與三子悉解官歸鄉里猶用漢家祖臘漢

行火盛于午故以午日為祖人問其故曰我先人豈知

火衰于戌故以戌日為臘也

王氏臘乎陳寵傳

何敞曰今賞賚過度臘賜自郎官以上公卿王侯以下

至于空竭帑藏損耗國資何敞傳注云臘賜大將軍三

梗米二百斛特進侯十五萬卿十萬校尉五萬尚書三

萬侍中將大夫各二萬千石六百石各七千虎賁羽林

郎二人共三千以為祀門戶直見漢官儀也

馬防私贍三輔衣冠臘日遺在洛中者各五千錢越騎

校尉光臘用羊三百頭米四百斛肉五千斤第五倫傳

荀彧卒獻帝哀惜之祖日為廢燕樂謂祭祖神之曰因為燕樂也共工氏

之子好遠遊祀以為祖漢以午日祖荀彧傳

大儺

先臘一日大儺謂之逐疫其儀選中黃門子弟年十歲以上十二以下百二十人為儺子皆赤幘阜製執大鼗方相氏黃金四目蒙熊皮元衣朱裳執戈揚盾十二獸有衣毛角中黃門行之冗從僕射將之以逐惡鬼于禁中夜漏上水朝臣會侍中尚書御史謁者虎賁羽林郎將執事皆赤幘陞衛乘輿御前殿黃門令奏曰儺子備請逐疫于是中黃門倡儺子和曰甲作食卵胃食虎雄

伯食魅騰簡食不祥攬諸食咎伯奇食夢強梁祖明共食磔死寄生委隨食觀錯斷食巨窮奇騰根共食蠱凡使十二神追惡凶赫女軀拉女幹節解女肉抽女肺腸女不急去後者為糧因作方相與十二獸儺嚙呼周徧前後省三過持炬火送疫出端門門外騶騎傳炬出宮司馬闕門門外五營騎士傳火棄雒水中百官官府各以木面獸能為儺人師訖設桃梗鬱儡葦菱畢執事陞者罷葦戟桃杖以賜公卿將軍特侯諸侯云禮儀志卒歲大儺毆除羣癘方相秉鉞巫覡操蒟音例儺子萬童

丹首元製。桃弧棘矢。所發無臬。音劉飛礫雨散。剛瘴必斃。煌火馳而星流。逐赤疫于四裔。然後凌天池。絕飛梁。捐螭魅。斫獠狂。斬蛟蛇。腦方良。囚耕父于清冷。溺女魃于神潢。殘夔魑與罔象。殪野仲而殲游光。八靈為之震懼。况魃蝥與畢方。度朔作梗。守以鬱壘。神荼副焉。對操索葦。日察區陬。司執遺鬼。京室謚清罔有不韙。東京賦

安帝永初三年。竇太后以陰陽不和。詔減逐疫。偃子之半。后紀

土牛

十二月立土牛六頭于國都郡縣城外丑地。以送大寒。志



甚多。至范史猶聞言行幸。東平王傳亦云。行東巡狩。禮儀志云。猶行出入皆鳴鐘作樂。蓋謂天子出入也。而注家妄引春秋釋疇。以為郡守行大夫禮樂。其誤甚矣。

漢祀令曰。天子行有所之。出河沈用白馬。珪璧各一。衣以繒緹五尺。祀用脯二束。酒六升。鹽一升。涉渭灞涇洛。佗名水如此者。沈珪璧各一。律在所給祠具。及行沈祠。佗川水先驅投石。少府給珪璧。不滿百里者不沈。祭祀志注桓帝元嘉元年四月己丑。上微服幸河南尹梁不疑府。

是日天大風。尚書楊秉諫曰。王者至尊。出入有常。警蹕而行。靜室而止。自非郊廟鸞旂。不駕。未有私從意志。日般遊諸臣之家。降亂尊卑。等威無別。宿衛守空宮。璽紱委女妾。設有非常之變。任章之謀。上負先帝。下悔靡及。臣以薄學。充在勸講。敢陳其愚。袁紀按楊秉傳作幸梁胤家

巡狩

世祖建武十七年四月乙卯。南巡狩。皇太子及右翊公輔。楚公英。東海公濟。陽南公廉。東平公蒼。從幸潁川。進幸葉。章陵五月己卯。車駕還宮。本紀下同

東漢會要 卷六  
十八年二月甲寅西巡狩幸長安二月壬午祠高廟遂有事于十一陵歷馮翊界進幸蒲坂祠后土夏四月甲戌車駕還宮

十九年九月南巡狩壬申幸南陽進幸汝南南頓縣舍置酒會賜吏人復南頓田租歲父老前叩頭言皇考居此日久陛下識知寺舍每來輒加厚恩願賜復十年帝曰天下重器常恐不任日復一日安敢遠期十歲乎吏人又言陛下實惜之何言謙也帝大笑復增一歲進幸淮陽二十年二月戊子車駕還宮

二十年十月東巡狩甲午幸魯進幸東海楚沛國十二月壬寅車駕還宮

三十年二月東巡狩甲子進幸魯濟南閏月癸丑車駕還宮

中元元年正月丁卯東巡狩二月己卯幸魯進幸太山北海王興齊王石朝于東嶽辛卯柴望岱宗登封泰山甲午禪于梁父四月癸酉車駕還宮

明帝永平二年十月甲子西巡狩幸長安祠高廟遂有事十一陵歷覽館邑會郡縣吏勞賜作樂癸卯車駕還

宮。

十年閏月甲午南巡狩幸南陽祠章陵日北至又祠舊宅禮畢召校官弟子作雅樂奏鹿鳴帝自御塤篿和之以娛嘉賓還幸南頓勞享三老官屬十二月甲午車駕還宮。

十五年二月庚子東巡狩辛丑幸偃師進幸彭城還幸孔子宅祠仲尼及七十二弟子親御講堂命皇太子諸王說經又幸東平辛卯進幸大梁至定陶四月庚子車駕還宮。

章帝建初七年十月西巡狩幸長安丙辰祠高廟遂有事十一陵進幸槐里又幸長平御池陽宮東至高陵造舟于涇而還每所到幸輒會郡縣吏人勞賜作樂十一月詔勞賜河東守令掾以下十二月丁亥車駕還宮元和元年七月丁酉南巡狩詔所經道上郡縣無得設儲時命司空自將徒支柱橋梁有遣使奉迎探知起居二千石當坐其賜鰥寡孤獨不能自存者粟人五斛十一月己丑車駕還宮賜從者各有差二年正月丙辰東巡狩幸泰山柴告岱宗進幸奉高宗

祀五帝于汶上明堂。幸魯祠孔子于闕里。四月乙卯車駕還宮。

元和中肅宗始修古禮。巡狩方岳。崔駰上四狩頌。以稱

漢德。本傳

三年正月丙申北巡狩。二月壬寅告常山諸郡太守。相曰。朕惟巡狩之制。以宣聲教。考同遐邇。解釋結冤也。今四國無政。不用其良。駕言出游。欲親知其劇易。前祠之園陵。遂望祀華嶽。東柴岱宗。爲人祈福。今將禮常山。遂徂北土。升踐隄防。諮訪耆老。肥田尙多。以賦貧民。進幸

中山祠北嶽。幸元氏祠。光武顯宗于縣舍。三月辛卯車駕還宮。賜從行者各有差。

章和元年八月癸酉南巡狩。戊子幸梁。乙未幸沛。庚子幸彭城。辛亥幸壽春。十月丙子車駕還宮。

和帝永元十五年九月壬午南巡狩。賜所過二千石長吏以下三老官屬及民百年者錢布各有差。幸章陵祠舊宅。十一月甲申車駕還宮。

安帝延光三年二月丙子東巡狩。辛卯幸泰山。柴告岱宗。祀五帝于汶上明堂。幸東平東郡。歷魏郡河內。壬戌



車駕還京師

並紀

朝會

每月朔歲首為大朝受賀其儀夜漏未盡七刻鐘鳴受賀及贄公侯璧中二千石二千石羔千石六百石雁四百石以下雉百官賀正月二千石以上上殿稱萬歲舉觴御坐前司空奉羹大司農奉飯奉食舉之樂百官受賜宴享大朔惟其每作樂十月旦從故事者高祖定秦之月元年歲首也注胡廣曰舊儀公卿每月常朝先帝以六月盛暑省之

蔡質漢儀曰正月旦天子幸德陽殿臨軒公卿將大夫百官各陪朝賀蠻貊胡羌朝貢畢見郡屬計吏皆陞觀庭燎宗室諸劉雜會萬人以上立西面位定公納薦太官賜食酒西入東出既定上壽計吏中庭北面立太官上食賜羣臣酒食貢事御史四人執法殿下虎賁羽林弧弓撮矢陸戟左右戎頭偃脰啟前向後左右中郎將住東西羽林虎賁將住東北五官將住中央悉坐就賜作九賓徹樂舍利從西方來戲于庭極乃畢入殿前激水化為比目魚跳躍嗽水作霧障日畢化成黃龍長八

東漢會要 卷六  
丈出水遊戲于庭。炫耀日光。以兩大絲繩。係兩柱中。頭  
間相去數丈。兩倡女對舞。行于繩上。對面道逢。切肩不  
傾。又蹋局。屈身藏形于斗中。鐘磬並作。樂畢。作魚龍曼  
延。小黃門吹三通。謁者引公卿羣臣。以次拜。微行出罷。  
卑官在前。尊官在後。德陽殿周旋容萬人。陛高二丈。皆  
文石作壇。激沼水于殿下。畫屋朱梁。玉階金柱。刻鏤作  
宮掖之好。厠以青翡翠。一柱三帶。韜以赤緹。天子正旦  
節會朝。百僚于此。自到。偃師去宮四十三里。望朱雀五  
闕。德陽其上。鬱律與天連。雒陽宮閣傳云。德陽宮殿南

北行七丈。東西行三十七丈。四尺。

志注

春王三朝會同漢京。是日也。天子受海之圖籍。膺萬國  
之貢珍。內撫諸夏。外綏百蠻。爾乃盛禮興樂。置乎雲龍  
之庭。陳百僚而贊羣后。究皇儀而展帝容。于是庭實干  
品。旨酒萬鍾。列金罍。班玉觴。嘉珍御。太牢饗。班固東  
都賦  
安帝永初四年。以年飢。正月元日會。徹樂不陳。充庭車。  
本紀注云。每大朝會。必陳乘輿  
法物。車輦于庭。以年飢。故不陳。

上尊號

建武元年。諸將議上尊號。馬武先進曰。天下無主。如有

東漢書 卷六  
聖人承敝而起。雖仲尼爲相，孫子爲將，猶恐無能有益。反水不收，後悔無及。大王雖執謙退，奈宗廟社稷何？宜且還薊，卽尊位，乃議征伐。今此誰賊而馳驚擊之乎？光武驚曰：何將軍出是言可斬也！武曰：諸將盡然。光武使出曉之，乃引軍還至薊。夏四月，公孫述自稱天子。光武從薊還過范陽，命收葬吏士。至中山，諸將復上奏曰：漢遭王莽，宗廟廢絕，豪傑憤怨，兆人塗炭。王與伯升首舉義兵，更始因其資以據帝位，而不能奉承大統，敗亂綱紀，盜賊日多，羣生危感。大王初征昆陽，王莽自潰，後拔

邯鄲，北州弭定。參分天下而有其二，跨州據土，帶甲百萬，言武力則莫之敢抗，論文德則無所與辭。臣聞帝王不可以久曠，天命不可以謙拒。惟大王以社稷爲計，萬姓爲心。光武又不聽，行到南平棘，諸將復固請之。光武曰：寇賊未平，四面受敵，何遽欲正號位乎？諸將且出，耿純進曰：天下士大夫捐親戚棄土壤，從大王于矢石之間者，其計固望其攀龍鱗，附鳳翼，以成其所志耳。今功業卽定，天人亦應，而大王留時逆眾，不正號位，純恐士大夫望絕計窮，則有去歸之思，無爲久自苦也。大眾一

散難可復合時不可留眾不可逆純言甚誠切光武深感曰吾將思之行至鄗光武先在長安時同舍生疆華自關中奉赤伏符曰劉秀發兵捕不道四夷雲集龍鬪野四七之際火為主羣臣因復奏曰受命之符人應為大萬里合信不議同情周之白魚曷足比焉今上無天子海內淆亂符瑞之應昭然著聞宜答天神以塞羣望光武於是命有司設壇場于鄗南千秋亭五成陌六月己未即皇帝位燔燎告天禋于六宗望于羣神其祝文曰皇天上帝后土神祇眷顧降命屬秀黎元為人父母

秀不敢當羣下百辟不謀同辭咸曰王莽篡位秀發憤興兵破王尋王邑于昆陽誅王郎銅馬于河北平定天下海內蒙恩上當天地之心下為元元所歸識記曰劉秀發兵捕不道卯金修德為天子秀猶固辭至于再至于三羣下僉曰皇天大命不可稽留敢不敬承于是建元為建武大赦天下紀

上壽

明帝永平十年僖耳降附富平侯張奮來朝上壽引見

宣平殿張奮傳

東漢會要 卷二  
十七年夏五月公卿百官以帝威德懷遠祥物顯應乃  
並集朝堂奉觴上壽制曰天生神物以應王者遠人慕  
化實由有德朕以虛薄何以享斯唯高祖光武聖德所  
被不敢有辭其敬舉觴明帝紀

拜皇太子

拜皇太子之儀百官會位定謁者引皇太子當御坐殿  
下北面司空當太子西北東面立讀策書畢中常侍持  
皇太子璽綬東向授太子太子再拜三稽首謁者贊皇  
太子臣某中謁者稱制曰可三公升階上殿賀壽萬歲

因大赦天下俱賜禮畢罷

禮儀志

拜諸侯王公

拜諸侯王公之儀百官會位定謁者引光祿勳前謁者  
引當拜前當坐伏殿下光祿勳前一拜舉手曰制詔其  
以某為某讀策書畢謁者稱臣某再拜尚書郎以璽印  
綬付侍御史侍御史前東面立授璽印綬王公再拜頓  
首三贊謁者曰某王臣某新封某公某初謝中謁者報  
謹謝贊者立曰謝皇帝為公興皆冠謝起就位供賜禮  
畢罷

養老

顯宗永平二年三月紀作十月上始帥羣臣養三老五更于辟雍行大射之禮郡縣道行鄉飲酒于學校皆祀聖師周公孔子牲以犬于是七郊禮樂三雍之義備矣養三老五更之儀先吉日司徒上太傅若講師故三公人名用其德行年耆老者一人爲老次一人爲更皆服都紵大袍單衣阜緣領袖中衣冠進賢扶玉杖五更亦如之不杖皆齋于太學講堂其日乘輿先到辟雍禮殿御坐東廂遣使者安車迎三老五更天子迎于門屏交禮道

自阼階三老升自賓階至階天子揖如禮三老升東面三公設几九卿正履天子親袒割牲執醬而饋執爵而酌祝鯁在前祝饘在後五更南面公進供禮亦如之明日皆詣闕謝恩以見禮遇大尊顯故也禮儀志

中元元年初建三雍顯宗卽位親行其禮天子始冠通天依日月備法物之駕盛清道之儀坐明堂而朝羣后登靈臺以望雲物袒割辟雍之上尊養三老五更享射禮畢帝正坐自講諸儒執經問難于前冠帶搢紳之人圍橋門而觀聽者蓋億萬計乃下詔曰光武皇帝建三

東漢會要 卷六  
朝之禮而未及臨享眇眇小子屬當聖業間暮春吉辰  
初行大射令月元日復踐辟雍尊事三老兄事五更安  
車輓輪俱緩執授侯王設醬公卿饌珍朕親袒割執爵  
而酌祝鯁在前祝饁在後升歌鹿鳴下管新宮八佾具  
修萬舞于庭朕固薄德何以克當易陳負乘詩刺彼已  
永念慚疚無忘厥心三老李躬年耆學明五更桓榮授  
朕尚書詩曰無德不報無言不酬其賜榮爵關內侯食  
邑五千戶三老五更以二千石祿養終厥身其賜天下  
三老酒人一石肉四十斤有司其存耆耄恤幼孤惠鰥

寡稱朕意焉

儒林傳及帝紀

永平八年十月丙子臨辟雍養三老五更

紀宋均曰三老老人知天

地人事者五更老人知五行更代之事者見禮儀志注

安帝以魯丕李充為三老

通典

楊統位至光祿大夫為國三老

楊厚傳

靈帝以袁逢為三老賜以玉杖

玉杖長九尺端以鳩為飾鳩者不咽之鳥欲老

人之不咽也

譙周曰漢中興定禮儀羣臣欲令三老答天子拜城門  
校尉董鈞駁曰養三老所以教事父之道也若答拜是

使天下答子拜也。詔從鈞議。譙周論之曰。禮尸服上服。猶以非親之故。答子拜。士見異國君亦答拜。是皆不得視猶子也。虞喜曰。且據漢儀。於門屏交禮。交禮即答拜。中興謬從鈞議。後革之。深得其意。志注

案比

仲秋之月。縣道皆案戶比民。年始七十者。授之玉杖。舖之糜粥。八十九十有加。賜玉杖長九尺。端以鳩鳥為飾。鳩者不噎之鳥也。欲老人不噎。志安帝元初四年詔曰。月令仲秋養衰老。授几杖行糜粥。

方今案比之時。郡縣多不奉行。雖有糜粥糠粃。相半長吏怠事。莫有躬親。甚違詔書養老之意。其務崇仁恕。賑護寡獨。稱朕意焉。紀

冠

正月甲子若丙子為吉日。可加元服。儀從冠禮。乘輿初緇布進賢。次爵弁。次武弁。次通天。以據皆于高祖廟如禮謁。王公以下。初加進賢而已。志

和帝永元三年正月甲子。皇帝加元服。賜諸侯王將軍特進中二千石列侯宗室子孫在京師奉朝請者黃金。



將大夫郎吏從官帛賜民爵及粟帛各有差大酺五日郡國中都官繫囚死罪贖縑至司寇及亡命各有差紀注

云太后詔袁安為賓賜束帛乘馬

通典曰和帝冠乘金根車駕六元虬至廟成禮乃迴軫反宮朝服以享宴撞太族之庭鐘咸獻壽焉黃香頌云唯永元之盛代聖皇德之茂純躬蒸蒸之至孝崇敬順以奉天以三載之孟春建寅月之上旬皇帝時加元冕簡甲子之元辰皇輿幸夫金根六元虬之連蜷建螭龍以為旂鳴節路之和鑿既臻廟以成禮

乃迴軫而反宮正朝服以享宴撞太族之庭鐘作藩屏與鼎輔暨夷蠻之君王咸進爵于金罍獻萬壽之玉觴

初肅宗勅曹褒條正禮儀褒依準舊典撰次天子至于庶人冠婚吉凶始終制度為百五十篇奏上會帝崩和帝即位褒乃作為章句帝遂以新禮二篇冠曹褒傳

安帝永初三年正月庚子皇帝加元服紀

順帝永建四年正月丙子皇帝加元服賜王主貴人公卿以下金帛各有差賜男子爵及流民欲占者人一級

東漢會要 卷六  
為父後三老孝弟力田人二級。鰥寡孤獨篤癯不能自存帛一匹。紀

桓帝建和二年正月甲子。皇帝加元服。紀

靈帝建寧四年正月甲子。皇帝加元服。紀

獻帝興平元年正月甲子。皇帝加元服。司徒滂于嘉為賓。加賜元纁駟馬。貴人公主卿司隸城門五校及侍中

尚書給事黃門侍郎各一人。為太子舍人。禮儀志注

建安十八年正月壬子。濟北王加冠。戶外以見父母。給

事黃門侍郎劉瞻兼侍中。假貂蟬加濟北王給之。禮儀志注

婚

桓帝初立。有司奏太后曰。春秋迎王后。在塗則稱后。今

大將軍冀女弟。膺紹聖善。結婚之際。有命既集。宜備禮

章。時進聘幣。請下三公太常案禮儀。奏可。于是悉依孝

惠皇帝納后故事。聘黃金二萬觔。納采雁璧乘馬束帛

一如舊典。梁后紀

大射 鄉飲

建武中。伏湛奏行鄉飲酒禮。施行之。本傳

明帝永平二年三月。臨辟雍。初行大射禮。郡縣道行鄉

飲酒禮于學校皆祀聖師周公孔子牲以犬于是七郊禮樂三雍之義備矣禮儀志

春日載陽合射辟雍設業設虞宮架金鏞設鼓路鼓植羽幢幢于是備物物有其容伯夷起而相儀后夔坐而為工張大侯制五正設三乏扉司旌并夾既飾儲乎廣庭于是皇輿夙駕輦于東階以須消啟明埽朝霞登天光於扶桑天子乃撫玉輅時乘六龍發鯨魚鯉華鍾大丙弭節風后陪乘攝提運衡徐至于射宮禮事展樂物具王夏闕騶虞奏決拾既次雕弓斯發達餘萌於暮春

昭誠心而遠喻東京賦

順帝陽嘉元年臨辟雍饗射紀

詔令 璽書 尺一

世祖以手跡賜方國者皆一札十行細書成文循吏序

尚書侍郎三十六人主作文書起草百官志

璽書漢官儀曰凡制書皆璽封尚書令重封見鮑昱傳

中元元年鮑昱為司隸校尉詔昱詣尚書使封胡降檄光武遣小黃門問昱有所怪不對曰故事通官文書不著姓又當司徒露布怪使司隸下書而著姓也帝報曰

吾故欲令天下知忠臣之子復為司隸也。鮑昱傳

鍾離意敢諫爭數封還詔書。本傳

永寧中尚書陳忠上疏薦周興曰伏惟古者帝王有所號令言必宏雅辭必溫麗垂于後世列于典經故仲尼嘉唐虞之文章從周室之郁郁臣竊見光祿郎周興孝友之行著於閭門清厲之志聞于州里蘊匱古今博物多聞三墳之篇五典之策無所不覽屬文著辭有可觀采尚書出納帝命為王喉舌臣等既愚闇而諸郎多文俗吏鮮有雅才每為詔文宣示內外轉相求請或以不

能而專己自由辭多鄙固興抱奇懷能隨輩栖遲誠可

歎惜詔乃拜興為尚書郎。周興傳

尺一選舉委尚書三公。陳蕃傳尺一謂版尺一以寫詔書也

順帝拜楊球為衛尉勅尚書不得稽留尺一。本傳

李雲上書曰尺一拜用不經御省。同上

臣天麟按周禮御史掌贊書鄭元注云若今尚書作詔文則知三代之時雖王言惟作命亦必有代言之官公孫宏謂武帝詔書下者文章爾雅訓辭深厚然在西都初不著所掌之官武帝每為淮南王報書必

召司馬相如視草乃遣此亦一時眷遇之厚非常典也至范史始言尚書侍郎三十六人主作文書起草然則兩漢代言之人當在尚書元帝時楊興欲薦賈捐之爲尚書令謂捐之曰君房下筆言語妙天下使君房爲尚書令勝五鹿充宗遠甚至安帝時尚書陳忠薦周興亦曰興屬文著辭有可觀采尚書出納帝命爲王喉舌臣旣愚闇而諸郎多文俗吏鮮有雅才每爲詔文宣示內外轉相求請興抱奇懷能隨輩栖遲誠可歎息漢世君臣其留意于代言之官若此宜

乎王通氏謂漢制幾於典誥而兩都賢主以七制稱良有以夫

章奏

民曹尚書主凡吏上書事

百官志

凡羣臣之書通於天子者四品一曰章二曰奏三曰表四曰駁議章者需頭稱稽首上以聞謝恩陳事詣闕通者也奏者亦需頭其京師官言稽首言下稽首以聞其中有所請若罪法劾案公府送御史臺卿校送謁者臺也表者不需頭上言臣某言下言誠惶誠恐頓首頓首

死罪左方下附曰某官臣甲乙上

漢雜事見胡廣傳注

建武七年詔上書者不得言聖

紀

明帝永平六年詔曰先帝詔書禁人上事言聖而問者章奏頗多浮詞自今若有過稱虛譽尚書皆宜抑而不省示不為詔子也

紀

明帝時公車以反支日不受章奏帝聞而怪曰民廢農桑遠來詣闕而復拘以禁忌豈為政之意乎于是遂蠲

其制

王符傳

東平王蒼上便宜其事留中

本傳

馮豹每奏事未報常俯伏省閣或從昏至明肅宗聞而

嘉之使黃門持被覆豹勅令勿驚

馮衍傳

左雄改察舉之制使文吏試章奏

左雄傳

白馬令李雲露布上書移副三府

李雲傳

封事

明帝永平三年八月詔曰古者卿士獻詩百工箴諫其言事者靡有所諱

紀

八年詔曰朕以無德上動三光日食之變其災尤大永思厥咎在予一人羣司勉修職事極言無諱於是在位

者皆上封事各言得失

按本紀諸帝每有災異皆令公卿上封事蓋自宣帝始令羣臣

得奏封事以知下情封有正有副領尚書者先登副封所言不善屏而不奏後魏相奏去副封以防壅蔽

章帝即位日食詔有司各上封事

紀

靈帝詔蔡邕指陳政要具對經術以阜囊封上

按張酺云文帝

飾帷帳以阜囊即為上書囊也則知文書言密事以阜囊封上自西都已然矣

建寧元年五月朔日有食之詔公卿以下各上封事

紀

二年四月癸巳大風雨雹詔公卿以下各上封事

四年詔公卿至六百石各上封事

東漢會要卷七

宋 徐 天 麟 撰

禮五 賓禮

封先代後 孔子後

建武二年封周後姬常為周承休公五年封殷後孔安

為殷紹嘉公十三年改封常為衛公安為宋公以為漢

賓在三公上 百官志

初平帝時王莽秉政乃封孔子後孔均為褒成侯追諡

孔子為褒成宣尼公及莽敗失國建武十三年世祖復

封均子志為褒成侯。志卒子損嗣。永元四年徙封褒亭侯。損卒子曜嗣。曜卒子元嗣。世世相傳至獻帝。初國絕。

孔熹傳

禮六 軍禮

講武 校獵

立秋之日自郊禮畢始揚威武。斬牲於郊東門以薦陵廟。其儀乘輿御戎路白馬朱鬣躬執弩射牲。牲以鹿麋。太宰令謁者各一人載獲車馳駟送陵廟。還宮遣使者齎束帛以賜武官。武官肄兵習戰陣之儀。斬牲之禮名。

曰驅劉。兵官皆肄孫吳兵法六十四陣。名曰乘之。立春遣使者齎束帛以賜文官。驅劉之禮祠先虞。執事告先虞已烹鮮。時有司告乃逡巡射牲。獲車畢有司告事畢。

禮儀志

漢承秦制三時不講。唯十月車駕幸長安水南門會五營士為八陣進退。名曰乘之。志注

永平元年六月乙卯初令百官驅腹白幕皆霜。同上

車駕數幸廣成苑。鍾離意以為從禽廢政常當車陳諫。般樂遊田之事。天子即時還宮。傳



十六年冬車騎校獵上林苑紀

明帝欲校獵河內東平王蒼上書諫曰臣聞時令盛春農事不聚眾興功傳曰田獵不宿食飲不享出入不節則木不曲直此失春令者也臣知車駕今出事從約省所過吏人諷誦甘棠之德雖然動不以禮非所以示四方也惟陛下因行田野巡視稼穡消搖徜徉弭節而旋至秋冬迺振威靈整法駕備周衛設羽旄詩云抑抑威儀惟德之隅臣不勝憤懣伏自手書乞詣行在所極陳至誠帝覽奏即還宮東平王傳

安帝初鄧太后臨朝俗儒世士以為文德可興武功宜廢遂寢蒐狩之禮息戰陣之法故猾賊縱橫乘此無備馬融以為文武之道聖賢不墜五材之用無或可廢元初二月上廣成頌以諷諫謹依舊文重述蒐狩之義作頌一篇并封上馬融傳

延光二年十月校獵上林苑

順帝永和四年十月校獵上林苑歷畱谷關而還

桓帝延熹元年校獵廣成遂幸上林苑並紀

六年十月校獵廣成遂幸畱谷關上林苑陳蕃上疏諫

東漢會要 卷一  
三  
曰。臣聞人君有事于苑囿。唯仲秋西郊。順時講武。殺禽助祭。以崇孝敬。如或違此。則爲肆縱。故皋陶戒虞無教逸遊。周公戒成王無槃于遊田。虞舜成王猶有此戒。況德不及二主者乎。夫安平之時。尚宜有節。況當今之世。有三空之厄哉。田野空。朝廷空。倉庫空。是爲三空。加兵戎未戢。四方離散。是陛下焦心毀顏。坐以待旦之時也。豈宜揚旂曜武。騁心輿馬之觀乎。又前秋多雨。民始種麥。今失其勤種之時。而令給驅禽除路之役。非賢聖恤民之意也。齊景公欲觀于海。放乎琅邪。晏子爲陳百姓

惡聞旌旗輿馬之音。舉首顰眉之感。景公爲之不行。周穆王欲肆車轍馬跡。祭公謀父爲誦祈招之詩。以止其心。誠惡逸遊之害人也。書奏不納。蕃傳

靈帝光和五年。校獵上林苑。畱谷關。遂巡狩于廣成苑。紀

獻帝中平五年。望氣者言。以爲京師當有大兵。兩宮流血。大將軍司馬許涼假司馬伍宏。說大將軍何進曰。太公六韜有天子將兵事。可以威厭四方。進以爲然。入言之于帝。于是乃詔進大發四方兵。講武于平樂觀。下起

東漢書 卷十  
大壇上建十二重五采華蓋高十丈壇東北爲小壇復建九重華蓋高九丈列步兵騎士數萬人結營爲陳天子親出臨軍駐大華蓋下進駐小華蓋下禮畢帝躬擐甲介馬稱無上將軍行陳三匝而還詔使進領兵屯於觀下是時置西園八校尉以小黃門蹇碩爲上軍校尉虎賁中郎將袁紹爲中軍校尉屯騎都尉鮑鴻爲下軍校尉議郎曹操爲典軍校尉趙融爲助軍校尉淳于瓊爲佐軍校尉又有左右校尉帝以蹇碩壯健而有武略特親任之以爲元帥督司隸校尉以下雖大將軍亦領

屬焉

何進傳

東都賦若迺順時節而蒐狩簡車徒以講武則必臨之以王制考之以風雅歷騶虞覽駟鐵嘉車攻采吉日禮官正儀乘輿乃出於是發鯨魚鏗華鍾登玉輅乘時龍鳳蓋颯灑和鸞玲瓏天官景從禋威盛容山靈護野屬御方神雨師汎灑風伯清塵千乘雷起萬騎紛紜元戎竟野戈鋌彗雲羽旄埽電旌旂拂天焱焱炎揚光飛文吐爛生風吹野燎山日月爲之奪明邱陵爲之搖震遂集乎中囿陳師案屯駢部曲列校隊勒三軍誓將帥

然後舉烽伐鼓以命三驅班固傳

東京賦維歲仲冬大閱西園上林苑也虞人掌焉先期戒事

悉率百禽鳩諸靈囿獸之所同是謂告備乃御小戎撫

輕軒中田四牡既健且閑戈矛若林牙旗繽紛迄于上

林結徒為營敘和植表司鐸授鉦坐作進退節以軍聲

三令五申示戮斬牲陳師鞠旅教達禁成火烈具舉武

士星敷驚鶴魚麗箕張翼舒軌陳掩迓匪疾匪徐馭不

詭遇射不翦毛升獻六禽時膳四膏馬足未極輿徒不

勞成禮三驅解罟放麟不窮樂以訓儉不殫物以昭仁

文選

饗遣衛士

饗遣故衛士儀百官會位定謁者持節引故衛士入自

端門衛司馬執幡鉦護行行定侍御史持節慰勞以詔

恩問所疾苦受其章奏所欲言畢享賜作樂觀以角抵

樂闕罷遣勸以農桑志

禮七 凶禮

帝陵

建武二年以皇祖考墓為昌陵置陵令守視後改為章

陵因以舂陵為章陵縣城陽恭王傳

光武原陵山方三百二十三步高六丈六尺垣四出司馬門寢殿鐘虞皆在周垣內隄封田十二頃五十七畝八十五步帝王世紀曰在臨平亭之南西望平陰東南去雒陽十五里

明帝顯節陵山方三百步高八丈無周垣為行馬四出司馬門石殿鐘虞在行馬內寢殿園省在東園寺吏舍在殿北隄封田七十四頃五畝帝王世紀曰故富壽亭也西北去雒陽三十七里

章帝敬陵山方三百步高六丈二尺無周垣為行馬四出司馬門石殿鐘虞在行馬內寢殿園省在東園寺吏舍在殿北隄封田二十五頃五十五畝帝王世紀曰在雒陽東南去雒陽三十九里

和帝慎陵山方三百八十步高十丈無周垣為行馬四出司馬門石殿鐘虞在行馬內寢殿園省在東園寺吏舍在殿北隄封田三十一頃二十畝二百步帝王世紀曰在雒陽四十一里

殤帝康陵山周二百八步高五丈五尺行馬四出司馬

東漢會要 卷一  
門寢殿鐘虞在行馬中。因寢殿爲廟園。寺吏舍在殿北。隄封田十三頃十九畝二百五十步。帝王世紀曰：高五丈四尺。去雒陽四十八里。

安帝恭陵。山周二百六十步。高十五丈。無周垣。爲行馬。四出。司馬門石殿鐘虞在行馬內。寢殿園。寺吏舍在殿北。隄封田一十四頃五十六畝。帝王世紀曰：高十二丈。在雒陽西北。去雒陽十五里。

順帝憲陵。山方三百步。高八丈四尺。無周垣。爲行馬。四出。司馬門石殿鐘虞在司馬門內。寢殿園。省寺吏舍在

殿東。隄封田十八頃十九畝三十步。帝王世紀曰：在雒陽西北。去雒陽十五里。

冲帝懷陵。山方百八十三步。高四丈六尺。爲寢殿。行馬四出門園。寺吏舍在殿東。隄封田五頃八十畝。帝王世紀曰：西北去雒陽十五里。

質帝靜陵。山方百三十六步。高五丈五尺。爲行馬。四出門。寢殿鐘虞在行馬中園。寺吏舍在殿北。隄封田十二頃五十四畝。因寢在廟。帝王世紀曰：在雒陽東。去雒陽三十二里。

桓帝宣陵。帝王世紀曰：山方三百步，高十二丈，在雒陽東南，去雒陽三十里。

靈帝文陵。帝王世紀曰：山方三百步，高十二丈，在雒陽西北，去雒陽二十里。

獻帝禪陵。帝王世紀曰：在河內山陽之濁城南，去雒陽三百一十里。

雜錄

先帝陵。每陵園令各一人，掌守陵園，案行埽除。丞及校長各一人，校長主兵戎盜賊事。百官志

先帝陵。每陵食官令各一人，掌望晦祭祀。上

建武三年，修西京園陵。紀

二十六年，光武初作壽陵，制地不過二三頃，無為山陵陂池，裁令流水而已。

永平十四年，明帝初作壽陵，制令流水而已。置吏卒數人，供給灑埽，勿開修道，敢有所興作者，以擅議宗廟法

從事。本紀

章帝欲為原陵，顯節陵起縣邑。東平王蒼上疏諫曰：竊見光武皇帝躬履儉約之行，營建陵地，具稱古典。詔曰：

東漢會要 卷七  
無為山陵陂池。裁令流水而已。孝明皇帝奉承無違。至於自所營創。尤為儉省。古者邱隴。且不欲其著明。豈況築郭邑建都郭哉。又以吉凶俗數言之。亦不欲無故繕修邱墓。帝從而止。東平王傳

園寢

更衣

古不墓祭。漢諸陵皆有園寢。承秦所為也。說者以為古宗廟前制廟後制寢。以象人之居前有朝後有寢也。月令有先薦寢廟。詩稱寢廟奕奕。言相通也。廟以藏主。以四時祭。寢有衣冠几杖象生之具。以薦新物。秦始出寢

起于墓側。漢因而弗改。故陵上稱寢殿。起居衣服象生人之具。古寢之意也。建武以來。關西諸陵。以轉久遠。但四時特牲祠。帝每幸長安。謁諸陵。乃太牢祠。自雒陽諸陵。至靈帝。皆以晦望。二十四氣。伏臘及四時祠廟。日土飯。太官送用物。園令食監典省其親陵。所宮人隨鼓漏。理被枕具。盥水陳嚴具。志

更衣別室

明紀注云。更衣者非正處也。園中有寢。有便殿。寢者陵上正殿。便殿寢側之別殿。即更衣也。

上陵



正月五供畢以次上陵西都舊有上陵東都之儀百官  
四姓親家婦女公主諸王大夫外國朝者侍子郡國計  
吏會陵書漏上水鴻臚設九賓隨立寢殿前鐘鳴謁者  
治禮引客羣臣就位如儀乘輿自東廂下太常導出西  
向拜止旋升阼階拜神坐退坐東廂西向侍中尚書陛  
者皆神坐後公卿羣臣謁神坐太官上食太常樂奏食  
舉舞文始五行之舞樂闋羣臣受賜食畢郡國上計吏  
以次前當神軒占其郡穀價民所疾苦欲神知其動靜  
孝于事親盡禮敬愛之心也周徧如禮最後親陵遣計

吏賜之帶佩八月飲酎上陵禮亦如之志

建武六年四月丙子幸長安始謁高廟遂有事于十一

陵紀下

十年八月己亥幸長安祠高廟遂有事于十一陵

十一年二月幸章陵祠園寢

十八年二月幸長安三月壬午祠高廟遂有事于十一

陵

二十二年閏月丙戌幸長安祠高廟遂有事于十一陵

中元元年三月行幸長安戊子祀長陵

東漢會要 卷七  
明帝永明元年正月。帝率公卿以下朝于原陵。如元會儀。

二年幸長安祠高廟。遂有事于十一陵。

章帝建初七年十月幸長安。丙辰祠高廟。遂有事于十一陵。遣使者祠太上皇于萬年。

和帝永元三年十月幸長安。十一月癸卯祠高廟。遂有事于十一陵。

順帝永和二年十月行幸長安。十一月丙午祠高廟。遂有事于十一陵。

桓帝延熹三年十月乙酉幸長安。甲午祠高廟。十一月庚子。遂有事于十一陵。

靈帝熹平元年正月。車駕上原陵。諸侯王公及外戚家婦女郡國計吏匈奴單于西域三十六國侍子皆會焉。如會殿之儀禮。樂闋百官受賜爵。計吏次上饗殿前。先帝御坐。具言俗善惡民所疾苦。司徒掾蔡邕慨然歎曰。吾聞古不墓祭。而朝廷有上陵之禮。如此其備也。察其本意。乃知孝明至孝。惻隱不易奪也。或曰。本意云何。對曰。西京之時。其禮不可得而聞也。光武帝始葬于此。

東漢會要 卷七  
明帝嗣位逾年，羣臣朝正，感先帝不復見此禮，乃率公卿百僚就寢而朝焉。瓜葛之親，男女畢會，郡計吏各向神坐而言，庶幾先帝魂神聞聽之也。袁紀及蔡邕本傳

大喪

詳見禮儀志下卷文多不再

服制

舊制公卿二千石刺史不得行三年喪，由是外內眾職並廢喪禮。安帝元初三年，鄧太后詔長史以下不為親行服者，不得典城選舉。時有上言牧守宜同此制，詔下公卿議者以為不便。司徒劉愷獨議曰：詔書所以為制

服之科者，蓋崇化厲俗以宏孝道也。今刺史一州之表，二千石千里之師，職在辯章百姓，宣美風俗，尤宜尊重典禮，以身先之。而議者不尋其端，至于牧守則云不宜，是猶濁其源而望流清，曲其形而欲景直，不可得也。太后從之。十一月丙戌，詔聽大臣二千石刺史行三年喪。

劉愷傳

安帝初，令大臣得行三年喪。尙書陳忠因此上言：孝宣皇帝舊令，人從軍屯及給事縣官者，大父母死未滿三月，皆勿徭令得葬送，請依此制。太后從之。至建光中，尙

書令祝諷尙書孟布等奏以爲孝文皇帝定約禮之制光武皇帝絕告寧之典貽則萬世誠不可改宜復建武故事忠上疏曰臣聞之孝經始于愛親終于哀戚上自天子下至庶人尊卑貴賤其義一也是以春秋臣有大喪君三年不呼其門閔子雖要經服事以赴公難退而致位以究私恩故稱君使之非也臣行之禮也高祖受命蕭何創制大臣有寧告之科合于致憂之義建武之初新承大亂凡諸國政多趣簡易大臣旣不得告寧而羣司營祿私念鮮循三年之喪以報顧復之恩臣願陛

下登高北望以甘陵之思揆度臣子之心則海內咸得其所宦豎不便之竟寢忠奏而從諷布議遂著于令

陳忠傳

建光元年十一月復斷大臣二千石以上服三年喪

桓帝永興二年初聽刺史二千石行三年喪服

永壽元年初聽中官得行三年喪服

延熹二年三月復斷刺史二千石行三年喪

並紀

九年至孝若爽對策曰夫喪親自盡孝之終也今之公卿及二千石三年之喪不得卽去殆非所以增崇孝道

而克稱火德者也。往者孝文勞謙行過乎儉，故有遺詔以日易月。此當時之宜，不可貫之萬世。今公卿羣僚皆政教所瞻，而父母之喪不得奔赴，夫人仁義之行自上而始。昔翟方進以身備宰相，而不敢踰制，至遭母憂三十六日而除。夫失禮之源，自下而始。古者大喪三年不呼其門，所以崇國厚俗，篤化之道也。事失宜正，過勿憚改。天下通喪，可如舊禮。荀爽傳

桓榮為越騎校尉，以母憂乞身，詔聽以侍中行服。韋彪父母卒，哀毀三年，不出廬寢。

鮑德子昂處喪毀瘠三年，抱負乃行。鈺期父卒，服喪三年，鄉里稱之。

袁夢麟曰：記言父母之喪，三年不從政。齊衰大功之喪，三月不從政。公羊傳曰：古者臣有大喪，則君三年不呼其門。閔子要經而服事，既而曰：若此乎古之道，不即人心退而致仕，孔子善之。漢興略因此意以立法，故大臣有告寧之科，所以崇孝道厚風俗也。自文帝遺詔以日易月，于是遵以為常。薛宣為丞相，母死弟修去官持服，宣謂修三年服少有行之者，兄弟相

東漢會要 卷一  
駁不可修遂竟服由是兄弟不和逮翟方進繼爲丞相母死既葬三十六日除服起視事以爲身備漢相不敢踰國家之制宣方進俱位大臣而所行若此其俗可以見矣然考之宣紀地節四年令民有大父母父母喪者勿繇事使得送終盡其子道哀紀令博士弟子父母死予寧三年楊雄傳注云漢律不爲親行三年喪不得選舉凡此皆詳于士民而略于百官公卿又何意耶光武中興遂絕告寧之典二千石公卿刺史不得行三年喪由是內外眾職並廢喪禮至安

帝元初中鄧太后詔長史以下不爲親行服者不得典城選舉時有上言牧守宜同此制詔下公卿議者以爲不便司徒劉愷獨言刺史一州之表二千石千里之師尤宜尊重典禮尙書陳忠亦言孝宣皇帝舊令人從軍屯及給事縣官者大父母死未滿三月皆勿繇令得葬送請依此太后皆從之而尙書令祝諷等奏以爲孝文定約禮之制光武絕告寧之典貽則萬世誠不可改忠復上疏爭之而宦監不便卒寢忠奏桓帝時荀爽又言漢爲火德火生于木木盛于火

東漢會要 卷十一  
故其性爲孝。今以公卿二千石三年之喪不得卽去。殆非所以增崇孝道而克稱火德也。天下通喪可如舊禮。夫三子之言如此。而卒不能復三年之制也。臣天麟按。兩漢喪服之制。雖不合于古禮。然士大夫至孝出于天性者。未嘗不服三年之喪。在西都則公孫宏原涉河間王良。在東京則桓榮韋彪。鈔期鮑昂。及東平王敞東海王臻兄弟。皆事親盡愛。送終竭哀。二史書之以爲罕見。所以貶時俗之不能盡其通喪也。

### 奪服

耿恭母先卒。追行喪制。有詔使五官中郎齎牛酒釋服。本傳注云奪情不令追服

桓焉爲太傅。以母憂自乞聽。以大夫行喪。踰年詔使者

賜牛酒奪服。本傳

太尉張酺父卒。既葬。詔遣使齎牛酒爲釋服。傳





雲翹育命舞祭祀志

二十八年賜東海王彊虎賁旄頭鍾虞之樂紀

中元元年二月辛卯登封泰山用樂如南郊祭祀志

二年立北郊祀后土奏樂亦如南郊同上

明帝永平三年八月戊辰改大樂為大子樂時博士曹

充上言漢再受命宜興禮樂帝問制禮樂云何對曰河

圖括地象曰有漢世禮樂文雅出尚書璇璣鈴曰有帝

漢出德治作樂名子帝善之下詔曰令且改大樂官曰

大子樂詩曲操以俟君子曹褒傳

十月烝祭光武廟初奏文始五行武德之舞前書曰文始舞者本

舜韶舞也高祖六年更名曰文始其無人執羽籥六行者本周舞也秦始皇二十六年更名曰五行其無人冠冕衣服法五行色武德者高祖四年作言行武以除亂也其無人執干戚光武草創禮樂未備今始奏之故云

初也

漢大樂律曰卑者之子不得舞宗廟之耐除吏二千石

到六百石及關內侯到五大夫子取適子高五尺以上

年十二到三十顏色和身體修治者以為舞人百官志注

永平三年八月丁卯公卿奏議世祖廟登歌八佾舞功

名東平王蒼議以為漢制舊典宗廟各奏其樂不皆相

襲以明功德。秦爲無道，殘賊百姓。高皇帝受命，誅暴元元，各得其所。萬國咸熙，作武德之舞。孝文皇帝躬行節儉，除誹謗，去肉刑，澤施四海。孝景皇帝制昭德之舞。孝武皇帝功德茂盛，威震海外，開地置郡，傳之無窮。孝宣皇帝制盛德之舞。光武皇帝受命中興，撥亂反正，武暢方外，震服百蠻，戎狄奉貢，宇內治平，登封告成，修建三雍，肅修典祀，功德巍巍，比隆前代。以兵平亂，武功盛大，歌所以詠德，舞所以象功。世祖廟樂名宜曰大武之舞。元命苞曰：緣天地之所雜樂，爲之文典。文王之時，民樂

其興師征伐，而詩人稱有武德。樞機鈐曰：有帝漢出，德洽作樂，各與虞韶禹夏湯濩周武無異，不宜以名舞。叶圖徵曰：大樂必易，詩傳曰：頌言成也。一章成篇，宜列德。故登歌清廟一章也。漢書曰：百官頌所登御者，一章十四句，依書文始五行武德，昭真修之舞節，損益前後之宜，六十四節爲舞曲，副八佾之數。十月烝祭始御，用其文始五行之舞如故，勿進武德舞歌。詩曰：於穆世廟，肅雍顯清，俊乂翼翼，秉文之成。越序上帝，駿奔求寧，建立三雍，封禪泰山，彰明圖讖，放唐之文，休矣惟德，罔射協

同本支百世。永保厥功。詔書曰。驃騎將軍議可。進武德

之舞如故。

東觀書見  
祭祀志注

十年閏月。南巡狩。幸南陽祠。章陵。日北至。又祠舊宅。禮

畢。召校官弟子。作雅樂。奏鹿鳴。帝自御塤箎。和之。以娛

嘉賓

紀

章帝即位。太尉趙熹等奏。孝明皇帝功德茂盛。宜上尊  
號曰顯宗。四時祫食于世祖廟。奏武德文始五行之舞。  
東平王蒼上言。昔孝文廟樂曰昭德之舞。孝武廟樂曰  
盛德之舞。今皆祫食于高廟。昭德之舞不進于高祖同

樂。今孝明皇帝在世祖廟。當同樂。盛德之樂無所施。如

自立廟。作武德之舞。上從王議。

祭祀志注

建初五年冬。以馬防上言。始施行月令迎氣樂。

東觀記曰防上

言聖人作樂所以宣氣致和順陰陽也臣愚以為可因  
歲首發太簇之律奏雅頌之音以迎和氣時以作樂器  
費多遂獨行十  
二月迎氣樂也

立春之日。迎春於東郊。歌青陽八佾雲翹之舞。于立夏  
之日。迎夏于南郊。歌朱明八佾舞雲翹之舞。先立秋十  
八日。迎黃雲于中兆。歌朱明八佾舞雲翹育命之舞。立  
秋之日。迎秋于西郊。歌西皓八佾舞育命之舞。立冬之

日迎冬于北郊歌元冥八佾舞育命之舞祭祀志又獻帝起居注曰

建安八年公卿迎氣北郊始復用八佾皇覽曰迎禮春夏秋冬之樂又順天道天子迎春于東堂唱之以角舞之以羽翟此迎春之樂也迎夏于南堂唱之以徵舞之以鼓鞀此迎夏之樂也迎秋于西堂唱之以商舞之以干戚此迎秋之樂也迎冬于北堂唱之以羽舞之以干戈此迎冬之樂也

先立秋十八日郊黃帝至立秋迎氣于黃郊奏黃鐘之

宮歌帝臨冕而執干戚舞雲翹育命所以養時訓也禮儀

志

日冬至夏至陰陽晷景長短之極微氣之所生也故使

八能之士八人或吹黃鐘之律間竽或撞黃鐘之鐘或

度晷景權水輕重水一升冬重十三兩或擊黃鐘之磬

或鼓黃鐘之瑟軫間九尺二十五絃宮處于中左右為

商徵角羽或擊黃鐘之鼓先之三日太史謁之至日夏

時四孟冬則四仲其氣至焉先氣至五刻太史令與八

能之士即坐于端門左塾大子具樂器夏赤冬黑列前

殿之前西上鐘為端守宮設席于器南北面東上正德

席鼓南西面令晷儀東北三刻中黃門持兵引太史令

八能之士入自端門就位二刻侍中尙書御史謁者皆

陛一刻乘輿親御臨軒安體靜居以聽之太史令前當

東漢會要 卷八  
軒溜北面跪舉手曰八能之士以備請行事制曰可太  
史令稽首曰諾起立少退顧令正德曰可行事正德曰  
諾皆旋復位正德立命八能士曰以次行事間音以等  
八能曰諾五音各三十爲闕正德曰合五音律先唱五  
音並作五十五闕皆音以等訖正德曰八能士各言事  
八能士各書板言事文曰臣某言今月若干日甲乙日  
冬至黃鐘之音調君道得孝道褒商臣角民徵事羽物  
各一板否則召太史令各板書封以皂囊送西陛跪授  
尚書施當軒北面稽首拜上封事尚書授侍中常侍迎

受報聞以小黃門幡麾節度太史令前白禮畢制曰可  
太史令前稽首曰諾太史命八能士詣太官受賜陛者  
以次罷日夏至禮亦如之禮儀志

春王三朝會同漢京食舉雍徹太師奏樂陳金石布絲  
竹鐘鼓鏗錡管絃曄煜抗五聲極六律歌九功舞八佾  
韶舞備太古畢四夷間奏德廣所及僭佻堯離罔不俱  
集萬樂備百禮暨皇歡浹羣臣醉降烟煴調元氣然後  
撞鐘告罷百寮遂退東京賦

每月朔歲首大朝愛賀舉觴御坐前奏食舉之樂百官

受  
受

受賜宴享大作樂詳見朝會類

元和二年幸魯祠孔子作代之樂孔僖傳

章帝增修羣祀又為靈臺十二門作詩客以其月祀而

奏之禮儀志

祠靈星舞者用童男十六人舞者象教田初為芟除次

耕種芸耨驅爵及穫刈春簸之形象其功也

和帝即位有司奏上尊章帝廟曰肅宗共進武德之舞

制曰可紀順帝陽嘉二年十月庚午行禮辟雍奏應鍾始復黃鍾

樂器隨月律紀袁紀云初隨月律作應鍾

桓帝親祠老子用郊天樂祭祀志

諸行出入皆鳴鍾作樂其有災青有它故若請雨止雨

皆不鳴鍾不作樂見禮儀志親耕條按此文云諸行出入言行者謂乘輿出入也故前書言

天子所幸皆曰行幸及歸言行自某所至舊注不察乃引春秋釋病以為漢法郡守出入得鳴鍾作樂其誤明矣

獻帝建安八年公卿初迎冬于北郊總章始復備八佾

舞因亂久廢今復備之見本紀

蔡邕禮樂志曰漢樂四品一曰大予樂典郊廟上陵殿

諸食舉之樂。郊樂，易所謂先王以作樂崇德，殷薦上帝。周官若樂六變，則天神皆降，可得而禮也。宗廟樂，虞書所謂琴瑟以詠，祖考來假。詩云：肅雍和鳴，先祖是聽。食舉樂，王制謂天子食舉以樂。周官王大食，則命奏鍾鼓。二曰：周頌雅樂，典辟雍享射六宗社稷之樂。辟雍享射，孝經所謂移風易俗，莫善于樂。禮記曰：揖讓而治天下者，禮樂之謂也。社稷，所謂琴瑟擊鼓，以御田祖者也。禮記曰：夫樂施於金石，越于聲音，用乎宗廟社稷，繫乎山川鬼神，此之謂也。三曰：黃門鼓吹，天子所以宴樂羣臣。

詩所謂坎坎鼓我，蹲蹲舞我者也。四曰：短簫鏡歌軍樂也。其傳曰：黃帝岐伯所作，以建威揚德，風勸士也。蓋周官所謂王大捷，則令凱樂，軍大獻，則令凱歌也。孝章皇帝親著歌詩四章，列在食舉。又制雲臺十二門詩，各以其月祀而奏之。熹平四年正月中，出雲臺十二門新詩，下大予樂官，習誦被聲，與舊詩並行者，皆當撰錄以成。

樂志

禮儀志注

詩頌

明帝永平十五年，東平王蒼獻光武受命中興頌。本傳

章帝元和二年為靈臺十二門作詩各以其月紀而奏之志

傅毅追美明帝功德最盛而廟頌未立乃依清廟作顯

宗頌十篇奏之文苑傳

曹朔作漢頌四篇蘇順傳

班固兩都賦東都主人作詩五篇其亂云

明堂詩於昭明堂明堂孔陽聖皇宗祀穆穆煌煌上帝宴享五位時序誰其配之世祖光武普天率土各以其職猗與緝熙允懷多福

辟雍詩迺流辟雍辟雍湯湯聖皇莅止造舟為梁皤皤國老迺父迺兄抑抑威儀孝友光明於赫太上示我漢行鴻化惟神永觀厥成休徵

靈臺詩迺經靈臺靈臺既崇辛勤時登爰考依證三光宣精五行布序習習祥風祁祁甘雨百穀溱溱庶卉蕃蕪屢惟豐年於皇樂胥

寶鼎詩嶽修貢兮川效珍吐金景兮歛浮雲寶鼎見兮色紛緼煥其炳兮被龍文登祖廟兮享神聖昭靈德兮彌億年



白雉詩啟靈篇兮披瑞圖獲白雉兮效素鳥發皓羽兮奮翹英容絜朗兮於瀄精章皇德兮侔周成永延長兮膺天慶

四夷樂

板楯蠻夷俗喜歌舞高祖觀之曰此武王伐紂之歌也乃命樂人習之所謂巴渝舞也南蠻傳永平中益州刺史朱輔上疏曰今白狼王唐敢等慕化歸義作詩三章緝負老幼若歸慈母遠夷之語辭意難正有捷為郡掾田恭頗曉其言輒令譯其詞語護送詣

闕并上其樂詩昔在聖帝舞四夷之樂今之所上庶備其一帝嘉之事下史官錄其歌焉西南夷傳

遠夷樂德歌詩曰

大漢是治提官隗構

與天合意魏昌踰槽

吏譯平端罔譯劉脾

不從我來旁慕支留

聞風向化徵衣隨旅

所見奇異知唐桑艾

多賜繪布邪毘繼繡

甘美酒食推潭僕遠

昌樂肉飛拓拒蘇便

屈申悉備局後仍離

蠻夷貧薄僕讓龍洞

無所報嗣莫支度由

願主長壽陽離僧麟

子孫昌熾莫稭角存

遠夷慕德歌詩曰

蠻夷所處

彼尼讓

日入之部

且交

慕義向化

繩動

歸日出主

路且

聖德深恩

聖德

與人富厚

魏菌

冬多霜雪

流絲邪

夏多和雨

尋邪

寒温時適

魏菌

部人多有

邪補

涉危歷險

歸險

不遠萬里

萬柳

去俗歸德

路德

心歸慈母

仍路

遠夷懷德歌詩曰

荒服之外

荒服

土地境垧

犁藉

食肉衣皮

阻蘇

不見鹽穀

莫湯

吏譯傳風

傳微

大漢安樂

夜拒

攜負歸仁

路仁

觸冒險陝

險龍

高山岐峻

倫狼

緣崖磻石

扶路

木薄發家

息落

百宿到洛

理瀝

父子同賜

捕莖

懷抱匹帛

懷豪

傳告種人

呼救

長願臣僕

陵陽

安帝卽位罷魚龍曼延百戲

本紀漢官典職曰作九賓

庭入殿前激水化成比目魚嗽水作霧化成黃龍長八丈出水遨戲于庭炫耀日光曼延者獸名也張衡西京賦所云巨獸百尋是為曼延音以戰反

永寧元年西南夷掸國王獻樂及幻人能吐火自支解

易牛馬頭明年元會作之於庭安帝與羣臣共觀大奇

之陳禪獨離席舉手大言曰昔齊魯為夾谷之會齊作

侏儒之樂仲尼誅之又曰放鄭聲遠佞人帝王之庭不宜設夷狄之技尚書陳忠劾奏禪曰古者合歡之樂舞于堂四夷之樂陳于門故詩云以雅以南韎任朱離今揮國越流沙踰縣度萬里貢獻非鄭衛之聲佞人之比而禪廷訕朝政請劾禪下獄有詔勿收陳禪傳

東漢會要卷九

宋

徐

天

麟

撰

輿服上

符璽附

玉路

天子五路以玉為飾錫樊纓十有再就建大常十有二旒九仞曳地日月升龍象天明也本志下同

乘輿

殷瑞山車金根之色承秦制御為乘輿所謂孔子曰乘殷之輅者也

金根 安車 立車

乘輿按此乘輿二字蓋言天子也 金根安車立車輪皆朱班重牙貳

轂兩轄金薄繆龍為輿倚較文虎伏軾龍首銜軛左右

吉陽笛鸞雀立衡檣文畫軛羽蓋華蚤建大旆十二旒

畫日月升龍駕六馬象鑣鏤錫金鏤方鉉插翟尾朱兼

樊纓赤罽易茸金就十有二左纛以犛牛尾為之在左

駢馬軛上大如斗是為德車五時車安立亦皆如之各

如方色馬亦如之白馬者朱其髦尾為朱鬣云所御駕

六餘皆駕四後從為副車

耕車

耕車其飾皆如之有三蓋一曰芝車置鞮耒耜之箠上

親耕所乘也

戎車

戎車其飾皆如之蕃以矛麾金鼓羽析幢翳鞮冑甲弩

之箠

獵車

獵車其飾皆如之重輞繆輪繆龍繞之一曰闕豬車親

校獵乘之

駟車

太皇太后皇太后法駕皆御金根加交路帳裳非法駕則乘紫罽駟車雲縠文畫駟黃金塗五末蓋蚤左右駟駕三馬

長公主赤罽駟車

大貴人貴人公主王如封君油畫駟車大貴人加節畫駟皆右駟而已

青蓋車

皇太子皇子皆安車朱班輪青蓋金華蚤黑縠文畫輦

文輦金塗五末皇子為王錫以乘之故曰王青蓋車

綠車

皇孫綠車以從皆左右駟駕三

阜蓋車

公列侯安車朱班輪倚鹿較伏熊軾阜繒蓋黑輦右駟中二千石二千石皆阜蓋朱兩輦其千石六百石朱左輦輦長六尺下屈廣八寸上業廣尺二寸九文十二初後謙一寸若月初生示不敢自滿也景帝中元五年始詔六百石以上施車輦侍銅五末輓有吉陽籥中二千

石以上右駢三百石以上阜布蓋千石以上阜繒覆蓋  
 二百石以下白布蓋皆有四維杠衣賈人不得乘馬車  
 除吏赤畫杠其餘皆青云案郭賀傳舊典傳車駢駕乘  
 赤帷裳唯賀為冀州勅去舊  
 帷謝承書曰孔恂字巨卿新淦人州別駕從事車前舊  
 有屏星如刺史車曲轡儀式時刺史行部發去日晏刺  
 史怒欲去別駕車屏星恂議曰明使君傳車自發晚而  
 欲徹去屏星毀國舊儀此不可行別駕可去屏星不可  
 省即投傳去刺史追辭謝請不肯還于  
 是遂不去屏星說文曰車當謂之屏星

夫人安車

公列侯中二千石二千石夫人會朝若蠶各乘其夫之  
 安車右駢加交路帷裳皆阜非公會不得乘朝車得乘

漆布輜軒車銅五末

大駕 法駕 小駕

乘輿大駕公卿奉引太僕御大將軍參乘屬車八十一  
 乘備千乘萬騎西都行祠天郊甘泉備之官有其注名  
 曰甘泉鹵簿東都唯大行乃大駕大駕太僕校駕法駕  
 黃門令校駕乘輿法駕公卿不在鹵簿中河南尹執金  
 吾雒陽令奉引奉車郎御侍中參乘屬車四十六乘前  
 驅有九旒雲罕鳳凰闌戟皮軒鸞旂皆大夫載鸞旂者  
 編羽旌列繫幢旁民或謂之雞翹非也後有金鉦黃鉞

黃門鼓車古者諸侯貳車九乘秦滅九國兼其車服故大駕屬車八十一乘法駕半之屬車皆阜蓋赤裏朱轡戈矛弩箠尚書御史所載最後一車垂豹尾豹尾以前比省中行祠天郊以法駕祠地明堂省什三祠宗廟尤省謂之小駕每出太僕奉駕上鹵簿中常侍小黃門副尚書主者郎令史副侍御史蘭臺令史副皆執注以督整車騎謂之護駕春秋上陵尤省於小駕直事尚書一人從其餘令以下皆先行後罷

輕車

輕車古之戰車也洞朱輪輿不巾不蓋建矛戟幢麾輶輅駟藏在武庫大駕法駕出射聲校尉司馬吏士載以次屬車在鹵簿中諸車有矛戟其飾幡旂旛幟皆五采制度從周禮孫吳兵法云有巾有益謂之武剛車武剛車者為先驅又為屬車為後殿焉

大使車

大使車立乘駕駟赤帷持節者重導從賊曹車各車督車功曹車皆兩大車伍百璫弩十二人辟車四人從車四乘無節單導從減半

小使車

小使車不立乘。有駢赤屏，泥油重絳帷。導無斧車。近小使車，蘭輿赤轂，白蓋赤帷。從騶騎四十人。此謂追捕考案有所勅取者之所乘也。諸使車皆朱班輪，四輻赤衡。輓其送葬，白堊以下灑車而後還。公卿中二千石二千石郊廟明堂祠陵法出，皆大車立乘，駕駟。他出乘安車。

載車

大行載車，其飾如金根車。加施組連璧，交絡四角，金龍首銜璧，垂五采析羽流蘇。前後雲氣畫帷裳，櫛文畫曲。

幡長，縣車等太僕御，駕六布施馬。布施馬者，涓白駱馬也。以黑藥灼其身，為虎文。既下馬，斥賣車藏城北秘宮。皆不得入城門。當用太僕考工，乃內飾治禮。吉凶不相干也。

導從車

公卿以下至縣，三百石長。導從置門下五吏。賊曹督盜賊功曹皆帶劍。三車從導，主簿主記兩車為從。縣令以上加導斧車。公乘安車，則前後并馬立乘。長安雒陽令及王國都縣，加前後兵車亭長。設右駢駕兩，璣駑車前。



伍伯公八人中二千石二千石六百石皆四人自四百石以下至二百石皆二人黃綬武官伍伯文官辟車輪下侍閤門闌部署街里走卒皆有程品多少隨所典領驛馬三十里一置卒皆赤幘絳鞵云古者軍出師旅皆從秦省其卒取其師旅之名焉公以下至二千石騎吏四人千石以下至三百石縣長二人皆帶劍持棨戟爲前列健弓鞵丸鞵諸侯王法駕官屬傅相以下皆備鹵簿似京都官騎張弓帶鞵遮迺出入稱課促列侯家丞庶子導從若會耕祠主縣假給辟車鮮明卒備其威儀

導從事畢皆罷所假

車馬飾

諸車之文乘輿倚龍伏虎檣文畫軻龍首鸞衡重牙班輪升龍飛軻皇太子諸侯王倚虎伏鹿檣文畫軻幡吉陽笛朱班輪鹿文飛軻旂旗九旂降龍公列侯倚鹿伏熊黑幡朱班輪鹿文飛軻九旂降龍卿朱兩輪五旂降龍二千石以下各從科品諸幡車以上軛皆有吉陽笛諸馬之文案乘輿金鏤方鉉插翟豕鏤龍畫總洙升龍赤扇汗青兩翅燕尾駙馬左右赤珥流蘇飛鳥節赤膺

兼皇太子亦如之王公列侯鏤錫又髻朱鑣朱鹿朱文絳扇汗青翅燕尾卿以下有駢者緹扇汗青翅尾當盧又髻上下皆通中二千石以上及使者乃有駢駕云

警蹕

魯恭傳注云天子入警出蹕

王者至尊出入常有警蹕而行靜室而止楊秉傳

璽

建武三年閏月丙子赤眉君臣面縛奉高皇帝璽綬二月己未祠高廟受傳國璽本紀

蔡邕獨斷曰皇帝六璽皆玉螭虎紐文曰皇帝行璽皇帝之璽皇帝信璽天子行璽天子之璽天子信璽皆以武都紫泥封之傳國璽是秦始皇初定天下所刻其玉出藍田山丞相李斯書之其文曰受命于天既壽永昌高祖至霸上秦王子嬰獻之至王莽篡位就元后求璽不與以威逼之乃出璽投地璽上螭一角缺及莽敗李松持璽詣宛上更始更始敗璽入赤眉劉盆子既敗以奉光武見本紀注又徐廣曰傳國璽文曰受天之命皇帝壽

漢舊儀曰璽皆白玉螭虎紐凡六璽皇帝行璽凡封  
 之璽賜諸侯王書信璽發兵召大臣天子行璽策拜  
 外國事天地鬼神皆以武都紫泥封青囊白素裹兩  
 端無縫尺一版中約署皇帝帶綬黃地六采不佩璽  
 璽以金銀滕組侍中組負以從秦以前民皆佩綬金  
 玉銀銅犀象為方寸璽各服所好志注  
 尚符璽郎中四人在中主璽及虎符竹符之半者百官志注  
 熹平六年八月戊辰袁紹等誅宦官引兵入宮張讓段  
 珪等急迫劫少帝及陳留王至小平津六璽不自隨辛

未帝還宮是日得六璽失傳國璽

袁紀

袁術死軍破徐璆得其盜國璽及還許上之

衛宏曰秦以前以金玉銀為方寸璽秦以來天子獨  
 稱璽又玉羣下莫得用其玉出藍田山題是秦李斯  
 書其文曰受命于天既壽永昌號曰傳國璽漢高祖  
 定三秦于嬰獻之高祖即位乃佩之王莽篡位就元  
 后求璽后乃出以投地上螭一角缺及莽敗時仍帶  
 璽紱杜吳殺莽不知取璽公賓就斬莽首並取璽更  
 始將李松送上更始赤眉至高陵更始奉璽上赤眉

建武三年盆子奉以上光武孫堅從桂陽入雒討董卓軍於城南見井中有五色光軍人莫敢汲堅乃浚得璽袁術有僭盜意乃拘堅妻求之術得璽舉以向肘魏武謂之曰我在不聽汝乃至此時璆得而獻之

徐璆傳注

魏受禪遣使求璽綬獻穆曹皇后不與如此數輩后乃呼使者入親責之以璽抵軒下因涕泣橫流曰上天不

祚爾左右莫能仰視

后紀

皇后璽綬

伏后紀注引蔡邕獨斷曰皇后赤綬玉璽

諸侯王列侯始封貴人薨皆令贈印璽

禮儀志

建武二十六年賜南匈奴黃金璽蓋綬

南匈奴傳

百官印

建武元年復設諸侯王金璽綬公侯金印紫綬九卿執金吾河南尹秩皆中二千石大長秋將作大匠度遼諸將軍郡太守國傅相皆秩二千石校尉中郎將諸郡都尉諸國行相中尉內史中護軍司直秩皆二千石以上皆銀印青綬中外官尚書令御史中丞治書侍御史公將軍長史中二千石丞正平諸司馬中宮王家僕雜

陽令秩皆千石。尚書中謁者黃門冗從四僕射諸郡監  
 中外諸都官令都侯司農部丞郡國長吏丞侯司馬千  
 人秩皆六百石。家令侍僕秩皆六百石。雒陽市長秩四  
 百石。主家長秩皆四百石。以上皆銅印黑綬。諸曹長楫  
 權丞秩三百石。諸秩千石者其丞尉皆秩四百石。秩六  
 百石者丞尉秩三百石。四百石者其丞尉秩二百石。縣  
 國丞尉亦如之。縣國三百石長丞尉亦二百石。明堂靈  
 臺丞諸陵校長秩二百石。丞尉校長以上皆銅印黃綬。  
 縣國守宮令相或千石或六百石。長相或四百石或三

百石。長相皆以銅印黃綬而有秩者。侍中中常侍光祿  
 大夫秩皆二千石。大中大夫秩皆比二千石。尚書諫議  
 大夫侍御史博士皆六百石。議郎中謁者秩皆比六百  
 石。小黃門侍郎中黃門秩皆比四百石。郎中秩皆比三  
 百石。太子舍人秩二百石。輿服志注  
 建武中馬援上書言臣所假伏波將軍印伏字犬外嚮  
 城皋令印字爲白下羊丞印四下羊尉印白下人人下  
 羊卽一縣長吏印文不同恐天下不正者多符印所以  
 爲信也所宜齊同薦曉古文字者事下大司空正郡國

印章奏可。東觀記見馬援傳注

節

符節令為符節臺率主符節事。凡遣使掌授節。百官志

中平六年始復節上赤葆。百官志

臣天麟按漢初節旄純赤武帝以衛太子持赤節乃

更節加黃旄東都因之中平六年董卓議廢立袁紹

掛節放上東門而去卓以紹棄節乃改第一葆為赤

旄也。

符

符節令見上

尚符璽節中掌璽及虎竹符之半者。百官志應劭曰銅

國家當發兵遣使者至郡合符符合乃聽受之竹使符

皆以竹箭五枚長五寸鐫刻篆書第一至第五張晏曰

符以代古之珪璋從簡易也顏師古曰與郡建武之初

守為符者謂各分其半右留京師左以與之禁網尚闊但以璽書發兵未有虎符之信杜詩上疏曰

舊制發兵皆以虎符其餘調發竹使而已間者發兵但

用璽書或以詔令如有奸人詐偽無由知覺愚以為軍

旅尚興賊虜未殄調兵郡國宜立虎符以絕奸端書奏

從之。杜詩傳

棨

凡居宮中者皆有口藉于門之所屬官名兩字為鐵印  
文符案省符乃內之若外人以事當入本宮長史為封  
棨傳其有官位出入令御者言其官

百官志

世祖召見杜詩賜以棨戟

漢制假棨戟以代斧鉞古今注曰棨戟前驅之器名以木

為之後以赤油韜為之亦謂之油戟

漢制棨戟即為斧鉞

郭躬傳

靈帝時竇武欲誅宦官曹節聞之驚起白帝請出御德  
陽殿取棨信閉諸禁門

竇武傳注云棨猶衣戟也漢官儀曰凡居中宮皆施藉于掖門

案姓名當入者本官為封棨傳審印信然後受

建武二十六年賜匈奴棨戟

匈奴傳

關符

郭丹從師長安買符入函谷關慨然歎曰丹不乘使者

車終不出關

符即繻也前書音義曰舊制入關皆用傳傳煩因裂繻帛分持後復出合之以為符

非真符也





輿備文日月星辰十二章三公諸侯用山龍九章九卿以下用華蟲七章皆備五彩大佩赤舄絢屨以承大祭百官執事者冠長冠皆毳服五嶽四瀆山川宗廟社稷諸沾秩祠皆衿玄長冠五郊各如方色云百官不執事各服常冠衿玄以從志

袁宏曰自三代服章皆有典禮周衰而其制漸微至戰國時各爲靡麗之服秦有天下而收用之上以供至尊下以賜百官而先王服章于是殘毀矣漢初文學既缺時亦草創輿服旂幟一承秦制故雖少改所用尚多至

是天子依周官禮記制度冠冕衣佩玉乘輿擬古式者矣袁紀

冕冠

冕冠垂旒前後遂延玉藻孝明皇帝永平二年初詔有司采周官禮記尚書皋陶篇乘輿服從歐陽氏之說公卿以下從大小夏侯氏之說冕皆廣七寸長尺二寸前圓後方朱綠裏玄上前垂四寸後垂三寸以白玉珠爲十二旒以其綬采色爲組纓三公諸侯七旒青玉爲珠卿大夫五旒黑玉爲珠皆有前無後各以其綬采色爲

組纓旁垂黠纈郊天地祀明堂則冠之衣裳玉佩備章  
采乘輿刺史公侯九卿以下皆織成陳留襄邑獻之云

長冠

長冠一曰齋冠高七寸廣三寸促漆纚爲之制如版以  
竹爲裏初高祖微時以竹皮爲之謂之劉氏冠楚冠制  
也民謂之鵲尾冠非也祀宗廟諸祀則冠之皆服衿玄  
絳緣領袖爲中衣絳綉練示其赤心奉神也五郊衣幘  
綉練各如其色此冠高祖所造故以爲祭服尊敬之至

也

委貌冠 皮弁冠

委貌冠皮弁冠同制長七寸高四寸制如覆杯前高廣  
後卑銳所謂夏之母追殷之章甫者也委貌以阜絹爲  
之皮弁以鹿皮爲之行大射禮于辟雍公卿諸侯大夫  
行禮者冠委貌衣玄端素裳執事者冠皮弁衣緇麻衣  
阜領袖下素裳所謂皮弁素積者也

爵弁冠

爵弁一名冕廣八寸長尺二寸如爵形前小後大緇其

東漢會要 卷一  
上似爵頭色有收持笄所謂夏收殷嘑者也祠天地五  
郊明堂雲翹舞樂人服之禮曰朱干玉鉞冕而舞大夏  
此之謂也

### 通天冠

述冠名  
通天冠高九寸正直頂少邪卻乃直下爲鐵卷梁前有  
山展筓爲述乘輿所常服服衣深衣制有袍隨時五色  
袍者或曰周公抱成王宴居故施袍禮記孔子衣縫掖  
之衣縫掖其袖合而縫大之近今袍者也今下至賤吏  
小史皆通制袍單衣阜緣領袖中衣爲朝服云

### 遠遊冠

遠遊冠制如通天有展筓橫之于前無山述諸王所服  
也

### 高山冠

高山冠一曰側注制如通天不邪卻直豎無山述展筓  
中外官謁者僕射所服太傅胡廣說曰高山冠蓋齊王  
冠也秦滅齊以其君冠賜近臣謁者服之

### 進賢冠

進賢冠古緇布冠也文儒者之服也前高七寸後高三

寸長八寸。公侯三梁。自二千石以下至博士兩梁。自博士以下至小吏私學弟子皆一梁。宗室劉氏亦兩梁冠。示加服也。

法冠

法冠一曰柱後。高五寸。以纒為展。筓鐵柱卷。執法者服之。侍御史廷尉正監平也。或謂之獬廌冠。獬廌神羊。能別曲直。楚王嘗獲之。故以為冠。胡廣說曰。春秋左氏傳有南冠而縶者。則楚冠也。秦滅楚。以其君服。賜執法近臣御史服之。

武冠

武冠一曰武弁大冠。諸武官冠之。侍中中常侍加黃金璫。附蟬為文。貂尾為飾。謂之趙惠文冠。胡廣說曰。趙武靈王效胡服。以金璫飾首。前插貂尾為貴職。秦滅趙。以其君冠賜近臣。建武時匈奴內屬。世祖賜南單于衣服。以中常侍惠文冠。中黃門童子佩刀云。

建華冠

建華冠以鐵為柱卷。貫大銅珠九枚。制似縷鹿。記曰。知天者冠述。知地者履絢。春秋左傳曰。鄭子臧好鷓冠。前

東漢會要 卷十  
圓以爲此則是也。天地五郊明堂育命舞樂人服之。

### 方山冠

方山冠似進賢以五采穀爲之。祠宗廟天子八佾四時五行樂人服之。冠衣各如其行方之色而舞焉。

### 巧士冠

巧士冠高七寸。要後相通直豎。不常服。唯郊天黃門從官四人冠之。在鹵簿中。次乘輿車前。以備宦者四星云。

### 卻非冠

卻非冠制似長冠下促。宮殿門吏僕射冠之。負赤幡青

翅燕尾。諸僕射幡皆如之。

### 卻敵冠

卻敵冠前高四寸。通長四寸。後高三寸。制似進賢。衛士服之。

### 樊噲冠

樊噲冠漢將樊噲造次所冠。以入項羽軍。廣九寸。高七寸。前後出各四寸。制似冕。司馬殿門大難衛士服之。或曰樊噲常持鐵楯。聞項羽有意殺漢王。噲裂裳以裹楯。冠之入軍門。立漢王旁視項羽。

術氏冠

術氏冠前圓。吳制。差池。邈迤。四重。趙武靈王好服之。今不施用。

鷓冠

鷓

諸冠皆有纓。執事及武吏皆縮纓。垂五寸。武冠俗謂之大冠。環纓。无。以青系為緄。加雙鷓尾。豎左右為鷓冠。云。五官左右。虎賁羽林五中郎將羽林左右監皆冠鷓冠。紗縠單衣。虎賁將虎文。綉白虎文。劍佩刀。虎賁武騎皆鷓冠。虎文單衣。襄邑歲獻。織成虎文。云。鷓者勇雉。

也。其鬪對一死乃止。故趙武靈王以表武事。秦施之焉。

幘

古者有冠無幘。其戴也加首有頰。所以安物。故詩曰。有頰者弁。此之謂也。三代之世。法制滋彰。下至戰國。文武並用。秦雄諸侯。乃加其武將首飾。為絳帟。以表貴賤。其後稍稍作顏題。漢興。續其顏。卻。擦之。施巾。連題。卻覆之。今喪幘。是其制也。名之曰幘。幘者。蹟也。頭首嚴蹟也。至孝文。乃高顏。題。續之為耳。崇其中為屋。合後施收。上下羣臣貴賤皆服之。文者長耳。武者短耳。稱其冠也。尙書

幘收方三寸名曰納言示以忠正顯近職也迎氣五郊各如其色從章服也皐衣羣吏春服青幘立夏乃止助微順氣尊其方也武吏常赤幘成其威也未冠童子幘無屋者示未成人也入學小童幘也向卷屋者示尚幼少未遠冒也喪幘卻擗反本禮也升數如冠與冠偕也期喪起耳有收素幘亦如之禮輕重有制變除從漸文也

佩玉

古者君臣佩玉尊卑有度上有鞞貴賤有殊佩所以章德服之衷也鞞所以執事禮之其也故禮有其度威儀之制三代同之五霸迭興戰兵不息佩非戰器鞞非兵旂於是解去鞞佩留其係璫以爲章表故詩曰鞞鞞佩璫此之謂也鞞佩既廢秦乃以采組連結于璫光明章表轉相結受故謂之綬漢承秦制用而弗改故加之以雙印佩刀之飾至孝明皇帝乃爲大佩衝牙雙瑠璜皆以白玉乘輿落以白珠公卿諸侯以采絲其視冕旒爲祭服云

佩刀

東漢會要 卷十一  
佩刀乘輿黃金通身貂錯半鮫魚鱗金漆錯雌黃室五色罽隱室華諸侯王黃金錯環挾半鮫黑室公卿百官皆純黑不半鮫小黃門雌黃室中黃門朱室童子皆虎爪文虎賁黃室虎文其將白虎文皆以白珠鮫爲鋤口之飾乘輿者加翡翠山紆嬰其側

佩印

佩雙印長寸二分方六分乘輿諸侯王公列侯以白玉自二千石以下至四百石皆以黑犀三百石以至私學弟子皆以象牙上合絲乘輿以縢貫白珠赤罽諸侯

王以下以絳赤絲鞮縢絳各如其印質刻書文曰正月剛卯既決靈及四方赤青白黃四色是當帝令祝融以教夔龍庶疫剛瘳莫我敢當疾日嚴卯帝令夔化慎爾周伏化茲靈及既正既直既觚既方庶疫剛瘳莫我敢當凡六十六字前書注云以正月卯日作

黃赤綬

乘輿黃赤綬四采黃赤紺縹淳黃圭長丈九尺九寸五百首

太皇太后皇太后其綬皆與乘輿同皇后亦如之



赤綬

諸侯王赤綬。四采赤黃縹紺瀘赤圭。長二丈一尺三百首。

長公主天子貴人與諸侯王同綬者加特也。

綠綬

諸國貴人相國皆綠綬。三采綠紫紺瀘綠圭。長二丈一尺二百四十首。

紫綬

公侯將軍紫綬。二采紫白瀘紫圭。長丈七尺百八十首。

公主封君服紫綬。

青綬

九卿中二千石二千石青綬。三采青白紅瀘青圭。長丈七尺百二十首。自青綬以上。繸皆長三尺二寸。與綬同采而首半。繸者古佩遂也。佩綬相迎受。故曰繸。紫綬以上。縫綬之間得施玉環。鑄云。

黑綬

千石六百石黑綬。三采青赤紺瀘青圭。長丈六尺八十首。四百石三百石長同。

黃綬

四百石三百石二百石黃綬。淳黃圭一采。長丈五尺六十首。自黑綬以下。緹綬皆長三尺。與綬同采而首半之。

青紺綸

百石青紺綸。一采宛轉繆織。長丈二尺。凡先合單紡爲一系。四系爲一扶。五扶爲一首。五首爲一文。文采淳爲一圭。首多者系細。少者系麤。皆廣尺六寸。

后夫人服

太皇太后皇太后入廟服。紺上阜下。蠶青上縹下。皆深。

衣制。隱領袖緣以條。翦菴繭簪珥。耳璫垂珠。簪以瑇瑁。爲撻長一尺。端爲華勝。上爲鳳凰。爵以翡翠爲毛羽。下有白珠垂黃金鑷。左右一橫。簪之以安。繭結。諸簪珥皆同制。其撻有等級焉。

皇后謁廟服。紺上阜下。蠶青上縹下。皆深。衣制。隱領袖緣以條。假結步搖。簪珥步搖。以黃金爲山。題貫白珠爲桂枝。相繆一爵。九華。熊虎。赤羆。天鹿。辟邪。南山。豐。大。特。六獸。詩所謂副笄六珈者。諸爵獸皆翡翠爲毛羽。金題。白珠璫。繞以翡翠爲華云。

貴人助蠶服純縹上下深衣制大手結墨瑋珥又加簪

珥。長公主見會衣服加步搖。公主大手結皆有簪珥。衣服同制。

自公主封君以上皆帶綬。以采組為緹帶。各如其綬色。黃金辟邪首為帶鐻。飾以白珠。

公卿列侯中二千石二千石夫人紺繒繭黃金龍首銜白珠魚須。長一尺為簪珥。入廟佐祭者。皂絹上下。助

蠶者。縹絹上下。皆深衣制。緣自二千石夫人以上至皇

后皆以蠶衣為朝服。公主貴人妃以上嫁娶得服錦綺。羅縠繒采十二色重緣袍。特進列侯以上錦繒采十二色。六百石以上重練采九色。禁丹紫紺。三百石以下五色。采青絳黃綠紅。二百石以上四采青黃紅紺。賈人細縹而已。公卿列侯以下皆單緣襪。制文繡為祭服。自皇后以下皆不得服諸古麗圭。穆閨緣加上之服。建武永平禁絕之。建初永元又復中重。于是世莫能有制其裁者。乃遂絕矣。

車服雜錄

光武行司隸校尉時更始諸將皆冠幘而服婦人衣繡擁鬚莫不笑之及見司隸僚屬皆歡喜曰不圖今日復見漢官威儀紀

凡冠衣諸服旒冕長冠委貌皮弁爵弁建華方山巧士衣裳文繡赤舄服絢履大佩皆為祭服其餘悉為常用朝服唯長冠諸王國謁者以為常朝服云宗廟以下祠祀皆冠長冠卓緇袍單衣絳緣領袖中衣絳袴練五郊各從其色焉

安帝立皇太子太子謁高祖廟世祖廟門大夫從冠兩

梁進賢洗馬冠高山罷廟侍御史任方奏請非乘從時皆冠一梁不宜以為常服事下有司尚書陳忠奏門大夫職如諫大夫洗馬職如謁者故皆服其服先帝之舊也方言可寢奏可謁者古者一名洗馬並本志

及將祀天郊報地功乃整法服正冕帶珩紃紘纒玉笄綦會火龍黼黻藻綵鞶厲結飛雲之袷輅植翠羽之高蓋建辰旒之太常紛飈悠以容裔六玄蚪之奕奕齊騰驥而沛艾龍駟華轡金鋹亡犯鏤錫方鈇左纛鉤膺玉璫襄鑿聲噦噦和鈴鈇鈇重輪貳轄疏轂飛鈴羽蓋葳

蕤葩瑤曲莖順時服而設副咸龍旂而繁纓立戈池夏  
 農輿輅木屬車九九乘軒並轂伏弩重旃朱旄青屋  
 奉引既畢先輅乃發鑾旂皮軒通帛綺飾雲罕九旂闕  
 鞞鞞鞞鞞髦被繡虎夫戴鷓駙承華之蒲稍馬飛流  
 蘇之騷殺總輕武於後陳奏嚴鼓之嘈囂才達戈士介  
 而揚揮載金鉦而建黃鉞東京賦  
 安帝永初四年以并涼飢饉正旦朝會不陳充庭車郭  
 賀為荊州刺史顯宗賜以三公服勅行部去檐帷使百  
 姓見其容服以章有德蔡茂傳

靈帝時賈琮拜冀州刺史舊典傳車驂駕垂赤帷裳迎  
 於州界及琮之部升車言曰刺史當遠視廣聽糾察美  
 惡何有反垂帷裳自掩塞乎乃命御者舉之賈琮傳  
 光武賜東海王彊虎賁旌頭  
 馬援從弟子游顧乘下澤車

安帝賜馮石駁犀貝劍佩刀紫艾綬玉玦各一  
 祭遵薨贈以朱輪容車介士  
 蔡邕對董卓曰前春郊天公奉引車駕乘金華青蓋爪  
 畫兩幡遠近以為非宜卓於是改乘阜蓋車蔡邕傳

梁冀改易輿服之制。作平輅車。埤幘。狹冠。折上巾。擁身扇。狐尾單衣。

銀艾

張奐前後十要銀艾注云銀印綠綬也以艾草染之故曰艾也

臣天麟按。上天下澤。而尊卑之分。以明。觀象審數。而輿服之儀。以備。古先聖王。所以制為車蓋旂常之文。冕弁采章之飾者。豈徒以備一代之制。彰斧藻之美而已。所以明尊卑辨等列。使之不得以相踰者也。故五車之制一定。則乘墨棧者。不得擬于篆纒。五冕之制一立。則服緇玄者。不得僭於鷩毳。所以檢攝人心。

維持名分者。蓋於此乎。寓焉。三代既衰。六籍焚蕩。秦人徒知尊君卑臣。而不知有禮制。是以古人輿服制度。浸以弗存。西京禮文本與秦儀雜就。而車服之制。因陋就簡。是以班史無傳焉。東京自顯宗致意於明堂辟雍靈臺之事。而輅車衮冕。其制始備。故范蔚宗序次本紀。載永平二年宗祀明堂。帝及公卿列侯始服冠冕衣裳。玉佩約屨。以行事。具序儒林傳曰。光武初建三雍。明帝即位。親行其禮。天子始冠通天衣。日月備法物之駕。盛清道之儀。蓋自周衰。歷數百年之

後東京之制始彷彿乎三代之舊史氏嚴而志之蓋亦幸其能復古矣然其間名物度數或仍秦漢之舊而未能盡加釐正君子亦不能無遺憾也

後漢書卷之十  
禮志第十  
禮志第十  
禮志第十  
禮志第十  
禮志第十  
禮志第十  
禮志第十  
禮志第十  
禮志第十  
禮志第十

